

DEPUTACIÓN PROVINCIAL

DA CORUÑA

**Acta da sesión ORDINARIA
celebrada pola EXCMA. CORPORACIÓN PROVINCIAL
o 26 de abril de 2007**

Orde do día dos asuntos que se van tratar na sesión PLENARIA ORDINARIA que se celebrará o vindeiro xoves, día 26 de abril de 2007, ás DOCE HORAS.

ASUNTOS

Actas

1.-Aprobación da acta da sesión anterior, nº 3/07 do 29 de marzo.

2.-Toma de coñecemento das resolucións ditadas pola Presidencia, da nº 3.680 á nº 5.750, de 2007.

Economía, Facenda e Especial de Contas

3.- Memoria da xestión de recadación do exercicio 2006.

4.-Dación de conta do informe final ou resumo de actuacións de control financeiro das subvencións pagas no exercicio 2005 e proposta de actuacións do Plan de auditorías para o control financeiro das subvencións pagadas no exercicio 2006.

Cooperación e Asistencia a Municipios

5.-Aprobación do proxecto reformado nº 2 da obra “Ampliación do abastecemento de auga a Cesuras, 4ª fase” do Concello de Cesuras, incluída no POL 2004. Código 04.2300.0127.0

6.-Toma de coñecemento dos informes emitidos o 19 de abril de 2007 polo equipo desta deputación encargado de realizar o “Plan de control interno dos proxectos de gasto incluídos no programa operativo local 2002-2006” sobre a realización das verificacións previstas no artigo 4 do Regulamento CE 438/2001 da Comisión.

Plans Especiais, Contratación e Equipamento

7.-Aprobación técnica do Plan de experiencia piloto da depuración de augas residuais en pequenos núcleos 2007, 1ª fase.

8.-Aprobación definitiva do expediente de cesión de uso á Administración xeral do Estado do edificio denominado “Prisma de Cristal”, para o seu destino a Museo Nacional de Ciencia e Tecnoloxía.

9.-Aprobación definitiva do expediente de cesión de uso ao Concello de Arteixo da parcela 33-B do Polígono de Sabón para a súa posta a disposición da Consellaría de Educación e Ordenación Universitaria para a construción dun centro de educación infantil e primaria.

Infraestruturas viarias: vías e obras provinciais

10.-Aprobación do proxecto reformado de acondicionamento da E.P. 3802 de Ordes á Ponte Carreira Pk: 0,00 a 0,71 (Ordes).

11.-Desestimación do acordo polo que se aprobou o proxecto incluído na 3ª relación da 2ª fase do Plan de travesías 2005 da obra EP 0205 Bertamiráns á Ramallosa, Pk. 0,00 a 3,13 e a solicitude á Xunta de Galicia da urxente ocupación dos bens e dereitos afectados pola obra.

12.-Aprobación provisional da primeira relación do Plan de travesías 2007, 2ª fase, integrada polo proxecto de seguridade viaria, beirarrúas e servizos na E.P. 6602 Fonte Díaz a Santa Irene entre o Pk. 2,350 a 3,950 (O Pino).

13.-Desistencia das alegacións presentadas e ratificación da solicitude de declaración de urxente expropiación á Xunta de Galicia dos bens e dereitos afectados pola expropiación da obra variante Quintáns, E.P. 7401 Urdilde a Antequera (Rois), incluída na 5ª relación do Plan de vías provinciais 2006-2008.

14.-Desistencia das alegacións presentadas e ratificación da solicitude de declaración de urxente expropiación á Xunta de Galicia dos bens e dereitos afectados pola expropiación da obra de ampliación da plataforma e mellora do trazado da E.P. 8202 As Galanas a Cacheiras, P.k. 0,000 a 4,490 (Teo).

15.-Aprobación do Plan de vías provinciais 2007-4ª fase integrado polo proxecto de ensanche da ponte sobre o río Allóns no Pk. 1,150 á E.P. 2404 A Laracha á Silva por Golmar (A Laracha).

Promoción Económica, Emprego e Turismo

16.-Aprobación do proxecto europeo Chronos, financiado ao abeiro do art. 6 do Regulamento do Fondo Social Europeo.

Persoal e Réxime Interior

17.-Modificación da regulación interna dos horarios de traballo do persoal da deputación.

18.-Modificación das especificacións do Plan de pensións.

Benestar Social, Políticas de Igualdade de Xénero e Normalización Lingüística

19.-Proposta de incremento da participación da Deputación Provincial da Coruña no proxecto europeo INTERREG III-A, denominado TURMAS.

20.-Convenio para instrumentalizar unha subvención nominativa a favor da “ASOCIACIÓN FINISTERRE EN AMÉRICA” (Arxentina) co obxecto de colaborar no financiamento de reformas no local social e equipamento dunha aula de informática.

ACTUACIÓN DE CONTROL
MOCIÓNS
ROGOS E PREGUNTAS

DONA PILAR SOUTO IGLESIAS	PSOE
DON MANUEL TABOADA VIGO	PP
DON JOSÉ LUIS TORRES COLOMER	PP
DONA MARGARIDA VÁZQUEZ VERAS	BNG
DON PABLO VILLAMAR DÍAZ	BNG

Non asiste o Sr. Campo Fernández.

Actúa como secretario, don José Luis Almau Supervía, secretario xeral da Corporación, e está presente o interventor xeral, don José Manuel Pardellas Rivera.

Aberto o acto ás doce horas e sete minutos, o Sr. Secretario procede á lectura dos asuntos incluídos na orde do día, tocante aos cales, por unanimidade, agás nos casos en que se indique, adoptáronse os seguintes acordos:

1.-APROBACIÓN DA ACTA DA SESIÓN ANTERIOR, Nº 3/07 DO 29 DE MARZO.

Apróbase a acta da sesión anterior, nº 3/07, do 29 de marzo.

2.-TOMA DE COÑECEMENTO DAS RESOLUCIÓNS DITADAS POLA PRESIDENCIA, DA Nº 3.680 Á Nº 5.750, DE 2007.

A Corporación toma coñecemento das resolucións ditadas pola Presidencia, da nº 3.680 á nº 5750, de 2007.

3.- MEMORIA DA XESTIÓN DE RECADACIÓN DO EXERCICIO 2006.

INTERVENCIONS

Sr. Lamas Sánchez

Anuncio o noso voto afirmativo desde o punto 3 ao punto 16, ambos os dous inclusive.

ACORDO

Dáse conta ao Pleno da Memoria da xestión de recadación do exercicio 2006.

4.- DACIÓN DE CONTA DO INFORME FINAL OU RESUMO DE ACTUACIÓNS DE CONTROL FINANCEIRO DAS SUBVENCIONS PAGAS

NO EJERCICIO 2005 E PROPOSTA DE ACTUACIÓN DO PLAN DE AUDITORÍAS PARA O CONTROL FINANCIERO DAS SUBVENCIÓNS PAGADAS NO EJERCICIO 2006.

Por unanimidade, apróbase o seguinte ditame da comisión:

“PRIMEIRO.- Aprobación dunha acción formativa dirixida ao persoal que dirixe, xestiona ou participa como membro nas entidades non lucrativas que teñan o seu domicilio ou realicen as súas actividades no ámbito territorial da provincia da Coruña. A acción deberá programarse seguindo os contidos propostos polos actuarios de control financeiro. O calendario, financiamento, medios persoais e materiais para levala a cabo serán determinados no seu momento, nas resolucións que se diten en execución do presente acordo.

SEGUNDO.- Que se modifiquen as seguintes Bases de execución do orzamento para o exercicio 2007:

1.- Base 32^a: no apartado “Xustificación de obrigas derivadas de subvencións non nominativas”, engadirase unha letra d), co seguinte texto: “d) No caso de subvencións outorgadas para investimentos, cando o importe a pagar sexa superior aos 30.000 euros, realizarase unha comprobación material do investimento no prazo de tres meses contados desde a realización do pago.

2.- Base 48^a (Subvencións nominativas para o exercicio 2007): onde se establecen as previsións que deben conter os convenios engadirase un punto que dispoña:

- No caso de subvencións outorgadas para investimentos, cando o importe a pagar sexa superior aos 30.000 euros, realizarase unha comprobación material do investimento executado no prazo de tres meses contados desde a realización do pago.

3.- Base 49^a (Subvencións nominativas non incluídas expresamente no orzamento de 2007): Na norma 4^a, inciso e), engadirase un punto co seguinte texto:

- No caso de subvencións outorgadas para investimentos, cando o importe a pagar sexa superior aos 30.000 euros, realizarase unha comprobación material do investimento executado no prazo de tres meses contados desde a realización do pago.

TERCEIRO.- Que nas bases de convocatorias que se aproben a partir de agora se lles esixa, con carácter xeral, aos beneficiarios que os pagos a terceiros se realicen mediante transferencia bancaria ou cheque nominativo. Quedarán exceptuados

desta obriga aqueles pagos de bens de consumo inmediato e os que teñan un importe inferior á contía que se estime razoable en cada programa.

CUARTO.- Que nas subvencións concedidas para investimentos se garanta a realización polos beneficiarios de actuacións íntegras ou proxectos completos, a non ser que a actuación sexa susceptible de ser dividida en fases, con uso ou aproveitamento separado en cada fase. Asemade, nas subvencións destinadas a investimentos, deberá quedar acreditado no expediente o cumprimento da normativa urbanística e calquera outra autorización que sexa preceptiva, de conformidade coa lexislación sectorial aplicábel en cada caso.

QUINTO.- Que, dándolle execución á previsión contida nas Bases de execución para o exercicio 2007, se aprrobe un novo Plan de auditorías con respecto ás subvencións pagadas no exercicio 2006, que cos parámetros e criterios previstos na proposta SEXTA do informe dos actuarios, quedaría do seguinte xeito:

- **UNIVERSO:** Todas as subvencións pagadas no exercicio 2006 con cargo aos capítulos 4º e 7º do estado de gastos, excluíndose aquelas nas que o beneficiario sexa unha entidade pública e aquelas entidades que xa foron obxecto de inclusión na escolma do exercicio 2006
- **PROCEDIMENTO DE ESCOLLA:** As ordes de pago expedidas deberán ser de xeito decrecente, atendendo ao seu importe. Unha vez ordenadas, dividiranse en cinco tramos, facéndose a escolla aleatoriamente e seleccionándose en cada tramo o número de expedientes que corresponda, todo iso segundo se detalla neste cadro:

TRAMO	Nº EXPEDIENTES DO TRAMO	PORCENTAXE DE CONTROL(%)	Nº DE EXPEDIENTES A CONTROLAR
1º	10	50	5
2º	100	25	25
3º	1000	5	50
4º	2000	2	4
5º	Resto	0,1	2
TOTAL			86

SEXTO.- Que se faculte ao presidente para ditar cantas resolucións sexan necesarias para a execución do presente acordo.”

5.- APROBACIÓN DO PROXECTO REFORMADO Nº 2 DA OBRA “AMPLIACIÓN DO ABASTECIMENTO DE AUGA A CESURAS, 4ª FASE” DO CONCELLO DE CESURAS, INCLUÍDA NO POL 2004. CÓDIGO 04.2300.0127.0

Por unanimidade, apróbase o seguinte ditame da comisión:

“Visto o proxecto reformado nº2 da obra “Ampliación do abastecemento de auga a Cesuras, 4ª-F”, do Concello de Cesuras, incluída no Programa operativo local 2004. (Código: 04.2300.0127.0) que foi presentado polo director das obras e que representa unha minoración no seu presuposto de contrata.

1º.- Aprobar por un importe total de 333.484,14 € o proxecto reformado da obra “Ampliación do abastecemento de auga a Cesuras, 4ª-F”, do Concello de Cesuras, incluída no Programa operativo local 2004. (Código: 04.2300.0127.0) que foi aprobado mediante acordo plenario adoptado o día 27 de febreiro de 2004.

2º.- Aprobar, así mesmo, a modificación do financiamento debido á minoración experimentada no presuposto do proxecto reformado que representa a cantidade de 333.484,14 € a prezos de contrata, sendo de 259.617,40 € a prezos de adxudicación.

Con iso, os datos de financiamento total da obra quedan como segue:

“Ampliación do abastecemento de auga a Cesuras, 4ª-F” (Código 04.2300.0127.0)				
(Concello de Cesuras)	Presuposto proxecto inicial a prezos de contrata	Presuposto reformado a prezos de contrata	Diferenza	
Deputación f.p.	80.019,93	38.703,46	-41.316,47	
Deputación	18.740,03	18.740,03	0	
Outros				
Estado	45.575,75	45.575,75	0	
FEDER	230.464,90	230.464,90	0	
TOTAL	374.800,61	333.484,14	-41.316,47	

3º.- Dispor a exposición pública mediante a publicación dun anuncio no BOP para os efectos de que durante o prazo de 10 días poidan presentarse as alegacións ou reclamacións que se consideren oportunas.

4º.- Remitir o expediente a informe da Subdelegación do Goberno en Galicia e á Comisión Provincial de Colaboración do Estado coas Corporacións Locais, para os efectos dispostos no art. 29.2 da Lei 6/1997 do 14 de abril de organización e funcionamento da administración xeral do Estado e no art. 9 do RD 835/2003 do 27 de xuño, polo que se regula a cooperación económica do Estado aos investimentos das entidades locais.

5º.- Remitir o expediente á Xunta de Galicia e á Comisión Galega de Cooperación Local para os efectos da coordinación disposta nos art. 112 e 188 e seguintes da Lei 5/1997, de administración local de Galicia.

6º.- Unha vez transcorrido o indicado prazo de 10 días de exposición pública e remisión a informe, sen que se presenten reclamacións ou alegacións, poderanse proseguir as actuacións.”



6.- TOMA DE COÑECEMENTO DOS INFORMES EMITIDOS O 19 DE ABRIL DE 2007 POLO EQUIPO DESTA DEPUTACIÓN ENCARGADO DE REALIZAR O “PLAN DE CONTROL INTERNO DOS PROXECTOS DE GASTO INCLUÍDOS NO PROGRAMA OPERATIVO LOCAL 2002-2006” SOBRE A REALIZACIÓN DAS VERIFICACIÓNS PREVISTAS NO ARTIGO 4 DO REGULAMENTO CE 438/2001 DA COMISIÓN.

Por unanimidade, apróbase o seguinte ditame da comisión:

Vistos os informes emitidos o 19 de abril de 2007 polo equipo desta deputación encargado de realizar o “Plan de control dos proxectos de gasto incluídos no Programa operativo local 2002-2006”, sobre a realización das verificacións previstas no artigo 4 do Regulamento CE 438/2001 da Comisión.

1.- Tomar coñecemento do contido dos devanditos informes, que afectan aos seguintes grupos de obras:

En primeiro lugar ás adxudicacións das 18 obras incluídas na segunda e terceira fase do POL 2006, numeradas da 220 á 237, cuxa relación é a seguinte:

MAP	DIPUT	AYTO.	PRESUPUESTO				
0,00	37.469,65	7.493,94	149.878,64				
0,00	23.920,62	4.784,13	95.682,51				
0,00	23.592,05	4.718,42	94.368,25				
0,00	103.513,11	20.702,63	414.052,46				
0,00	43.007,55	8.601,52	172.030,25				
0,00	22.475,37	4.495,08	89.901,50				
20.237,26	84.936,09	21.034,67	420.693,40				
0,00	137.898,39	27.579,68	551.593,58				
0,00	17.460,36	3.492,08	69.841,48				
0,00	22.712,12	4.518,40	88.860,74				

En segundo lugar refírese aos 17 proxectos que tiveron un reformado con incremento no POL 2000-2006 e ás 2 obras que tiveron un proxecto de terminación debido á resolución do contrato inicialmente adxudicado, estando parcialmente executada a obra, sendo necesario adxudicarlle a un novo contratista o proxecto pendente de terminación.

Para este grupo realizouse unha mostra representativa de 6 expedientes cuxa relación é a que a continuación se indica:

PROGRAMA OPERATIVO LOCAL 2000-2006						
OBRAS CON PROYECTOS REFORMADOS Y TERMINACIÓN						
Número Obra	Ayuntamiento	DENOMINACIÓN	PRESUPUESTO ADJUDICACIÓN	INCREMENTO S/ADJ.		%
				Declarado	Pendiente	
00.2301.0017.0	MAÑÓN	CP 4401 ORTIGUEIRA-AS PONTES POR BARQUERO	728.060,05	143.230,54		19,67
01/02.2300.0056.0	RIBEIRA	CANALIZACIÓN RIO AV. ROS CASTRO	465.600,87	183.980,61		39,51
02.2300.0071.0	BRION	SAN. Y ABAST. AGUA BRION	560.195,22	111.953,51		19,98
02.2300.0078.0	MUXIA	EDIFICIO SERVICIOS MULTIPLES	824.803,70	242.635,40		29,42
02/03.2301/2300.0090.0	VIMIANZO	TRASVASE Y DEP. EN BAÑAS Y DISTRIB. OTROS PL	548.119,34	108.543,80		19,80
04/05.2301/2300.0145.0	DUMBRIA	CENTRO SOC.CULTURAL OLVEIRA	438.181,76	87.088,62		19,87
TOTAL			3.564.960,94	877.432,48	0,00	

O informe emitido o 19 de abril de 2007 indica que a deputación cumpriu cos requisitos establecidos pola normativa comunitaria e nacional relativa á contratación pública, e comprobouse que nos expedientes administrativos consta toda a documentación correspondente ao procedemento aplicable. Non obstante, púxose de manifesto a demora no cumprimento do requisito formal dos prazos de publicación da adxudicación á que se refire o artigo 93 do Texto refundido da lei de contratos das administracións públicas.

2.- Adoptar a seguinte medida de mellora relativa á única incidencia formal detectada:

Facer un seguimento do cumprimento dos prazos de publicación da adxudicación previstos no art. 93 do R.D. 2/2000 polo que se aproba o T.R.L.C.A.P., analizando no seu caso as circunstancias obxectivas que poidan concorrer en cada expediente.

3.- Remitir o presente acordo ao Ministerio de Administracións Públicas para os efectos do seu traslado aos órganos de seguimento do Programa operativo local.

7.- APROBACIÓN TÉCNICA DO PLAN DE EXPERIENCIA PILOTO DA DEPURACIÓN DE AUGAS RESIDUAIS EN PEQUENOS NÚCLEOS 2007, 1ª FASE.

Por unanimidade, apróbase o seguinte ditame da comisión:

“1.- Aprobar tecnicamente o Plan EXPERIENCIA PILOTO DE DEPURACIÓN DE AUGAS RESIDUAIS EN PEQUENOS NÚCLEOS 2007 1ª FASE integrado polos proxectos que a continuación se relacionan e tomar en consideración os proxectos incluídos nel, para os efectos de obter as autorizacións e licencias preceptivas e se é o caso os terreos necesarios para a súa execución, cun orzamento total de 380.716,45 euros, podéndose financiar con cargo á aplicación 0401/441A/60101 e que son as que a continuación se detallan:

CÓDIGO	CONCELLO	DENOMINACIÓN	ORZAMENTO
--------	----------	--------------	-----------

07.1400.0001.0	AMES	ESTACIÓN DEPURADORA DE AUGAS RESIDUAIS DA AGLOMERACIÓN RURAL DE SANTA MARÍA DE AMEIXENDA	141.990,85
07.1400.0002.0	CARIÑO	ESTACIÓN DEPURADORA DE AUGAS RESIDUAIS DA AGLOMERACIÓN RURAL DE FEÁS	163.787,36
07.1400.0003.0	FISTERRA	ESTACIÓN DEPURADORA DE AUGAS RESIDUAIS DO NÚCLEO RURAL DE DENLE	74.938,24
TOTAL			380.716,45

2.- Expoñer ao público os proxectos mediante un anuncio que se ha publicar no Boletín Oficial da Provincia nun prazo de dez días para os efectos de reclamacións, transcorrido o cal sen que estas se produzan, consideraranse definitivamente aprobados.

3.- Facultar ao presidente desta Corporación para a execución do presente acordo e todas as actuacións necesarias para a súa posta en marcha e en especial para a sinatura dos respectivos convenios de colaboración cos concellos incluídos neste plan así como para a inclusión dos gastos de mantemento durante 2 anos, que se agregarán ao orzamento de contrata da obra para os efectos da súa contratación conxunta.

4.- Unha vez realizadas as actuacións descritas a contratación das obras necesarias requirirá a acreditación dos requisitos anteriormente citados e do crédito orzamentario necesario para afrontar o gasto.

8.- APROBACIÓN DEFINITIVA DO EXPEDIENTE DE CESIÓN DE USO Á ADMINISTRACIÓN XERAL DO ESTADO DO EDIFICIO DENOMINADO “PRISMA DE CRISTAL”, PARA O SEU DESTINO A MUSEO NACIONAL DE CIENCIA E TECNOLOXÍA.

Por unanimidade, apróbase o seguinte ditame da comisión:

“De conformidade cos acordos adoptados polo Pleno da Corporación en sesións celebradas o 25 de xaneiro de 2007 e 29 de marzo de 2007 e transcorrido o prazo de exposición pública (BOP nº 74 do 30/03/07), sen que se formulasen alegacións:

1º.- Aprobar definitivamente o expediente de cesión de uso á Administración Xeral do Estado do edificio “Prisma de Cristal” e os terreos onde se sitúa o citado edificio, que ten unha superficie de 4.622,31 m².

Os bens obxecto da cesión de uso valóranse en 13.298.396,79 euros, e de acordo coa seguinte descrición:

A) Terreos situados na Avenida de Labañou, que se describen detalladamente no plano adxunto e cuxa valoración ascende a 3.845.484,58 euros, segundo o informe do Servizo de Arquitectura do 22-12-2006.

B) Edificio en construción (Prisma de Cristal), cuxo proxecto de execución ascendeu inicialmente a 7.939.951,18 euros.

C) A deputación asume o compromiso de rematar as obras previstas no proxecto modificado do 5-03-2007, do que figura un exemplar no expediente, por un importe de 1.512.961,03 euros.

2º.- A cesión de uso do inmovible suxéitase ás seguintes condicións:

- 1.- A cesión de uso outórgase coa finalidade exclusiva de que a Administración Xeral do Estado destine o edificio cedido a Museo Nacional de Ciencia e Tecnoloxía.
- 2.- A Administración Xeral do Estado poderá utilizar calquera das formas de xestión establecidas no ordenamento xurídico.
- 3.- O Museo deberá ater funcionamento dentro do prazo máximo de 4 anos contados a partir da entrega do inmovible por parte da Deputación Provincial da Coruña Transcorrido o devandito prazo, sen que entre en funcionamento o Museo, o inmovible reverterá automaticamente á deputación.
- 4.- No suposto de que por calquera causa o inmovible deixe de destinarse a Museo Nacional da Ciencia e Tecnoloxía, con independencia do prazo transcorrido a partir da cesión, o inmovible reverterá automaticamente á deputación.
- 5.- A Administración Xeral do Estado asume a partir da data de entrega todos os gastos de conservación e mantemento do edificio e as súas instalacións.
- 6.- O pagamento de todos os tributos que afectan ao citado inmovible ou á súa actividade será por conta da Administración Xeral do Estado.
- 7.- O alumnado dos centros educativos da provincia terán entrada gratuíta ao futuro Museo en visitas colectivas organizadas pola Deputación Provincial da Coruña.
- 8.- A deputación poderá utilizar gratuitamente os espazos do Museo para a celebración de conferencias, exposicións ou actividades científicas, nas datas fixadas por mutuo acordo coa Dirección do Museo.
- 9.- Calquera obra, agás as de conservación e mantemento deberá ser autorizada previamente e de forma expresa pola deputación.
- 10.- A propiedade do inmovible seguirá sendo en todo momento da Deputación Provincial da Coruña, sen que en ningún caso a presente cesión de uso sexa habilitadora da adquisición da propiedade a favor da Administración Xeral do Estado.
- 11.- A deputación entregará o edificio unha vez executadas as obras a que se refire a condición expresada no punto primeiro. Para estes efectos ambas partes formalizarán a correspondente acta de entrega.

3º.- Facultar ao presidente para a execución do presente acordo e, se é o caso, para a sinatura dos convenios ou documentos que requiran a súa aplicación efectiva.”

9.- APROBACIÓN DEFINITIVA DO EXPEDIENTE DE CESIÓN DE USO AO CONCELLO DE ARTEIXO DA PARCELA 33-B DO POLÍGONO DE SABÓN PARA A SÚA POSTA A DISPOSICIÓN DA CONSELLARÍA DE EDUCACIÓN E ORDENACIÓN UNIVERSITARIA PARA A CONSTRUCCIÓN DUN CENTRO DE EDUCACIÓN INFANTIL E PRIMARIA.

Por unanimidade, apróbase o seguinte ditame da comisión:

“De conformidade co acordo adoptado polo Pleno da Corporación en sesión celebrada o 29 de marzo de 2007 e transcorrido o prazo de exposición pública (BOP 74 do 30/03/07), sen que se formulasen alegacións:

1.- Aprobar definitivamente o expediente de cesión de uso a favor do Concello de Arteixo para a posta a disposición da Consellaría de Educación e Ordenación Universitaria para a construción dun centro de educación infantil e primaria (CIEP), dos bens propiedade da deputación que a continuación se describen: parcela 33-B do Polígono Industrial de Sabón cuxa superficie é de 10.028 m²., e os seus lindeiros aos catro ventos os seguintes; norte: parcela 34 do Polígono Industrial de Sabón; sur: parcela 30 do Polígono Industrial de Sabón; leste: río Arteixo; e oeste: parcela 33-A do Polígono Industrial de Sabón e a vía denominada Avenida Arsenio Iglesias

2.- Establecer como condicións da cesión de uso as seguintes:

A.- A cesión outórgase coa finalidade exclusiva de instalar un colexio de educación infantil e primaria, que deberá estar finalizado e en uso no prazo de cinco anos a partir da entrega da posesión, transcorridos os cales sen iniciarse a actividade reverterá a parcela nesta deputación, para o cal será suficiente con acta notarial expresiva de que o Concello de Arteixo, a requirimento notarial, non puido xustificar o efectivo funcionamento do colexio.

B.- No caso de que por calquera razón a citada parcela deixase de destinarse á actividade para a que se cedeu, con independencia do prazo transcorrido desde a cesión, a parcela reverterá automaticamente a esta Deputación provincial.

C.- O pagamento de taxas, contribucións, impostos e demais tributos que se devenguen da segregación e, se é o caso, da cesión de uso da parcela serán de conta do Concello de Arteixo.

D.- O Concello de Arteixo asume todos os custos de conservación e de mantemento.

E.- Así mesmo, correrán por conta do Concello de Arteixo todos os impostos que afecten á parcela entrementes a utilice o Concello de Arteixo.

F.- A propiedade da parcela en cuestión seguirá sendo en todo momento desta Deputación provincial, sen que en ningunha forma a presente cesión sexa causa habilitadora da adquisición do propiedade a favor do Concello de Arteixo.

10.- APROBACIÓN DO PROXECTO REFORMADO DE ACONDICIONAMENTO DA E.P. 3802 DE ORDES Á PONTE CARREIRA PK: 0,00 A 0,71 (ORDES).

Por unanimidade, apróbase o seguinte ditame da comisión:

“1.- Aprobar o proxecto reformado de acondicionamento da E.P. 3802 de Ordes á Ponte Carreira pk. 0,00 ao 0,71 polo seu orzamento de contrata de 230.311,90 euros, que representa un incremento respecto ao primitivo de 13.193,18 euros.

2.- Formalizar en documento administrativo, co adxudicatario do contrato primitivo DIEZTRIGO, S.L. con CIF B27160373, as modificacións do contrato, que aplicando a baixa de adxudicación supoñen un novo orzamento de adxudicación de 177.869,88 euros, que representa un incremento respecto ao primitivo de 10.189,09 euros.

3.- Modificar a contía da garantía definitiva que queda incrementada na cantidade de 407,56 euros, que deberá ingresar o contratista na Caixa Xeral da Corporación dentro do prazo máximo de 15 días, unha vez aprobada a modificación do contrato, polo tanto queda fixada a garantía co citado incremento na cantidade 7.114,79 euros.

11.- DESESTIMACIÓN DO ACORDO POLO QUE SE APROBOU O PROXECTO INCLUÍDO NA 3ª RELACIÓN DA 2ª FASE DO PLAN DE TRAVESÍAS 2005 DA OBRA EP 0205 BERTAMIRÁNS Á RAMALLOSA, PK. 0,00 A 3,13 E A SOLICITUDE Á XUNTA DE GALICIA DA URXENTE OCUPACIÓN DOS BENS E DEREITOS AFECTADOS POLA OBRA.

Por unanimidade, apróbase o seguinte ditame da comisión:

“1.- Desistir do acordo plenario do 27/10/05 polo que se aprobaron os proxectos incluídos na TERCEIRA RELACIÓN DA SEGUNDA FASE DO PLAN DE TRAVESÍAS 2005, no que se inclúe o proxecto de execución de obras E.P. 0205 BERTAMIRÁNS Á RAMALLOSA PK. 0,00 A 3,13 (código da obra 0511300008.0, código do proxecto de gastos 2005P0017), toda vez que de conformidade co informe emitido polo Servizo de Infraestruturas e Conservación terase que modificar o citado proxecto á vista da información recibida do alcalde no sentido de que lles parece máis interesante e viable outra solución que posiblemente evite o trámite de expropiación ao conseguir a cesión voluntaria dos terreos necesarios para a execución da obra, propónse a paralización do expediente de expropiación.

2.- Desistir do acordo do Pleno do 27/10/05 polo que se aprobou a solicitude á Xunta de Galicia da urxente ocupación dos bens e dereitos afectados pola expropiación á que de lugar a realización das obras incluídas no proxecto E.P. 0205 BERTAMIRANS Á RAMALLOSA PK. 0,00 A 3,13 (código da obra 0511300008.0, código do proxecto de gastos 2005P0017)

3.- Así mesmo, desistir do acordo do Pleno do 27/04/06 polo que se aprobou a ratificación da solicitude á Xunta de Galicia da urxente ocupación dos bens e dereitos afectados pola expropiación á que dea lugar a realización das obras incluídas no proxecto E.P. 0205 BERTAMIRANS Á RAMALLOSA PK. 0,00 A 3,13 (código da obra 0511300008.0, código do proxecto de gastos 2005P0017)

4.- Comunicar o presente acordo á Xunta de Galicia.

5.- Someter a información pública o presente acordo mediante a publicación do

correspondente anuncio no Boletín Oficial da Provincia cun prazo de quince días para reclamacións, entendéndose definitivamente aprobado se estas non se producen.”

12.-APROBACIÓN PROVISIONAL DA PRIMEIRA RELACIÓN DO PLAN DE TRAVESÍAS 2007, 2ª FASE, INTEGRADA POLO PROXECTO DE SEGURIDADE VIARIA, BEIRARRÚAS E SERVIZOS NA E.P. 6602 FONTE DÍAZ A SANTA IRENE ENTRE O PK. 2,350 A 3,950 (O PINO).

Por unanimidade, apróbase o seguinte ditame da comisión:

“1.- Aprobar provisionalmente A PRIMEIRA RELACIÓN DO PLAN DE TRAVESÍAS 2007, SEGUNDA FASE, integrada polo proxecto que se relaciona por ser o que se axusta ao disposto no Texto refundido das bases de colaboración entre a Deputación Provincial da Coruña e os concellos para executar o proxecto que se ha de incluír nas distintas fases do Plan de travesías provinciais 2004-2007

CÓDIGO	DENOMINACIÓN	ORZAMENTO
07.1130.0003.0	SEGURIDADE VIARIA, BEIRARRÚAS E SERVIZOS NA E.P. 6602 FONTE DÍAZ A SANTA IRENE ENTRE O PK. 2,350 AO 3,950 (O PINO)	676.297,66
TOTAL		676.297,66

2.- Expoñer ao público, unha vez aprobados provisionalmente por un prazo de 10 días para efectos de reclamacións, entendéndose definitivamente aprobado o plan e os proxectos que o integran no caso de non presentárense reclamacións.

3.- Polo que se refire á contratación das obras, esta será obxecto de expediente independente que se tramitará unha vez que se aprrobe definitivamente o plan.”

13.-DESISTENCIA DAS ALEGACIÓNS PRESENTADAS E RATIFICACIÓN DA SOLICITUDE DE DECLARACIÓN DE URXENTE EXPROPIACIÓN Á XUNTA DE GALICIA DOS BENS E DEREITOS AFECTADOS POLA EXPROPIACIÓN DA OBRA VARIANTE QUINTÁNS, E.P. 7401 URDILDE A ANTEQUEIRA (ROIS), INCLUÍDA NA 5ª RELACIÓN DO PLAN DE VÍAS PROVINCIAIS 2006-2008.

Por unanimidade, apróbase o seguinte ditame da comisión:

“1.- Dar por rematada a fase de información pública no expediente de expropiación que se segue para a execución das obras incluídas no proxecto VARIANTE QUINTANS, E.P. 7401 URDILDE A ANTEQUEIRA (ROIS)

2.- Desestimar as alegacións presentadas dado que non desvirtúan a necesidade da urxente ocupación dos bens e dereitos afectados e por formular cuestións que deberán dilucidarse nas fases posteriores do expediente de expropiación.

3.- Ratificar a solicitude de declaración de urxente expropiación á Xunta de Galicia dos

bens e dereitos afectados pola expropiación á que dea lugar a realización das obras indicadas, tendo en conta, que no presente caso existen razóns de urxencia que fan necesaria a execución da citada obra, tales como que:

- As características físicas, técnicas e xeotécnicas do terreo entre os Pk. 0,700 a 3,300 xa que existen zonas de labranza, prados, pantanosas e inundables polo Rego de Quintáns.
- - O estudo da mellora viuse condicionado ao discorrer o tramo entre os Regos de Quintáns e Casteláns e a media ladeira nunha zona eminentemente montañosa e de forte pendente, polo que se tiveron en conta condicionantes como a separación do regato, estudo do desmonte para evitar grandes tamaras, presenza de camiños e pistas, pequenas depresións e valgas e o paso obrigado por unha serie de puntos para salvar a orografía do terreo.
- - hai que ter en conta, así mesmo, a existencia de curvas perigosas con pequeno radio, o estado do firme, e o ancho da calzada con dimensións inferiores ás necesidades de viandantes e vehículos.
- - Proporcionarlles maior seguridade aos viandantes á hora de circular pola estrada e permitir o estacionamento circunstancial de vehículos.
- Todo iso coa fin de evitar o altísimo risco de accidentes con perigo para a vida humana.”

14.- DESISTENCIA DAS ALEGACIÓNS PRESENTADAS E RATIFICACIÓN DA SOLICITUDE DE DECLARACIÓN DE URXENTE EXPROPIACIÓN Á XUNTA DE GALICIA DOS BENS E DEREITOS AFECTADOS POLA EXPROPIACIÓN DA OBRA DE AMPLIACIÓN DA PLATAFORMA E MELLORA DO TRAZADO DA E.P. 8202 AS GALANAS A CACHEIRAS, P.K. 0,000 A 4,490 (TEO).

Por unanimidade, apróbase o seguinte ditame da comisión:

“1.- Dar por rematada a fase de información pública no expediente de expropiación que se segue para a execución das obras incluídas no proxecto de AMPLIACIÓN DE PLATAFORMA E MELLORA DE TRAZADO DA E.P. 8202 AS GALANAS A CACHEIRAS, PK. 0,000 AO PK. 4,490 (TEO)

2.- Desestimar as alegacións presentadas dado que non desvirtúan a necesidade da urxente ocupación dos bens e dereitos afectados e por formular cuestións que deberán dilucidarse nas fases posteriores do expediente de expropiación.

3.- Ratificar a solicitude de declaración de urxente expropiación á Xunta de Galicia dos bens e dereitos afectados pola expropiación á que dea lugar a realización das obras indicadas, tendo en conta, que no presente caso existen razóns de urxencia que fan necesaria a execución da citada obra, tales como que:

- A actual estrada ten unha lonxitude aproximada de 4,490 km. e que discorre por unha zona de relevo maino, e presenta varias zonas con curvas de radio moi

pequeno (zona de Adrán e da Igrexa) e cunha plataforma de 5,50 m. un largo de calzada de 5 m e 0,5 de beiravía (non obstante existen puntos máis estreitos como pola Igrexa)

- O trazado proxectado realizouse adaptándose o máis posible ao actual (agás as variantes nos pk. 0+00 ao 0+40, 2+40 ao 2+60 e 3+53 a 4+04 e as rectificacións de curvas e axustes de trazado.
- As primeira variante vén determinada pola ligazón da E.P. 8202 coa glorieta que se vai executar na N550 dentro das obras da autovía Santiago-Brión; as outras variantes veñen determinadas para salvar dúas zonas con trazado moi deficiente e perigoso.
- No pk 0+420 proxéctase unha glorieta co fin de ordenar o tráfico, punto de escasa visibilidade no que conflúen varias estradas.
- Proporcionar maior seguridade aos viandantes á hora de circular pola estrada e permitir o estacionamento circunstancial de vehículos.

Todo iso coa fin de evitar o altísimo risco de accidentes con perigo para a vida “humana.”

15.- APROBACIÓN DO PLAN DE VÍAS PROVINCIAIS 2007-4ª FASE INTEGRADO POLO PROXECTO DE ENSANCHE DA PONTE SOBRE O RÍO ALLÓNS NO PK. 1,150 Á E.P. 2404 A LARACHA Á SILVA POR GOLMAR (A LARACHA).

Por unanimidade, apróbase o seguinte ditame da comisión:

“1.- Aprobar o Plan de vías provinciais 2007, 4ª fase, integrado polo proxecto que a continuación se relaciona e tomar en consideración os proxectos incluídos neles, cun orzamento total de 211.067,19 euros, con cargo á partida 0401/511B61102:

CÓDIGO	DENOMINACIÓN	ORZAMENTO
07.1110.0010.0	ENSANCHE DA PONTE SOBRE O RÍO ALLÓNS NO PK. 1,150 DA E.P. 2404 A LARACHA Á SILVA POR GOLMAR (A LARACHA)	211.067,19
TOTAL		211.067,19

2.- Expoñer ao público o proxecto mediante un anuncio que se ha publicar no Boletín Oficial da Provincia nun prazo de dez días para os efectos de reclamacións, transcorrido o cal sen que estas se produzan, consideraranse definitivamente aprobado.”

16.- APROBACIÓN DO PROXECTO EUROPEO CHRONOS, FINANCIADO AO ABEIRO DO ART. 6 DO REGULAMENTO DO FONDO SOCIAL EUROPEO.

Por unanimidade, apróbase o seguinte ditame da comisión:

“1º Tomar coñecemento da concesión da subvención concedida pola Dirección Xeral de Emprego e Igualdade de Oportunidades da Comisión Europea

ao proxecto no marco da convocatoria “Medidas innovadoras financiadas en virtude do artigo 6 do Regulamento do Fondo Social Europeo –liña orzamentaria 04.021000.11 -enfoques innovadores da xestión do cambio”, ao proxecto CHRONOS, no que participan as seguintes entidades: Deputación da Coruña, Deputación de Pontevedra, Consellaría de Traballo, Confederación de Empresarios de Galicia, Unión Xeral de Traballadores de Galicia, Sindicato Nacional de Comisións Obreiras de Galicia, Provincia di Viterbo, Centre do Minho, Talete Soc. Coop.; do acordo entre a Dirección Xeral de Emprego, Asuntos Sociais e Igualdade de Oportunidades da Unión Europea e o xefe de Fila (Deputación de Pontevedra) e do orzamento total de execución:

Achega do F.S.E.	1.348.593,68€	68,1249%
Achegas propias	630.996,72€	31,8751%
Total proxecto	1.979.590,40€	100%

2º Aprobar a posta en marcha do proxecto CHRONOS e facultar á Presidencia para realizar as xestións necesarias para iso, de acordo co seguinte orzamento:

Achega do F.S.E	229.979,51€
Achega da Deputación da Coruña	107.605,50€
Total orzamento da Deputación da Coruña	337.585,01€

PARTIDA	TIPO DE GASTO	DOTACIÓNS ORZAMENT.	2007	2008
0104/322Ñ/131.00	Retribucións persoal laboral eventual	122.348,76 €	61.174,38€	61.174,38€
0104/322Ñ/160.03	Cotas sociais	73.851,24€	36.925,62€	36.925,62€
0104/322Ñ/226.99	Gastos diversos	17.651,23€	8.825,62€	8.825,61€
0104/322Ñ/227.99	Traballos realizados por empresas	123.733,78€	61.866,89€	61,866,89€
TOTAIS		337.585,01€	168.792,51€	168.792,50€

A achega da deputación no ano 2007 realizarase co cargo ás aplicacións orzamentarias mencionadas anteriormente.”

17.-MODIFICACIÓN DA REGULACIÓN INTERNA DOS HORARIOS DE TRABALLO DO PERSOAL DA DEPUTACIÓN.

INTERVENCIÓNS

Sr. Lamas Sánchez

Non dubidamos en absoluto a vontade do equipo de goberno con esta modificación da regulación interna dos horarios de traballo do persoal da Deputación, entendemos que a finalidade é unha finalidade boa, pero tampouco podemos deixar pasar por alto os informes neste caso, non a favor, dos diferentes sindicatos. Eu creo

que sería interesante un esforzo por alcanzar un acordo que entendo que podería ser interesante para todo o persoal, creo que é unha cuestión que nos consta que a vontade do grupo de goberno é alcanzar ese acordo e nós, en prol precisamente de buscar ese acordo total con todo o persoal, entendemos que é un tema importante de cara ao futuro, o que solicitamos é que se retire da orde do día, que quede para outro Pleno e, se non é así, o noso voto vai ser abstención.

Sr. presidente

Antes de pasarlle a palabra ao Sr. Nogueira, polo que eu entendo neste punto 17 vai o horario, que é o que está no convenio, e o que está na lei, que son 37 horas e media, e logo, para compatibilizar a vida laboral e familiar permítese unha flexibilidade, permítese que a xente poida entrar ata as 9 da mañá e saír ás dúas e media, que logo terá que recuperar esas horas polas tardes ou o sábado, e creo que están excluídos deste acordo os centros que teñen unhas características específicas determinadas, que se están negociando para chegar a un acordo, pero doulle a palabra ao Sr. Nogueira, porque saberá máis ca min deste tema.

Sr. Nogueira Fernández

Pouco máis do que dixo o presidente. Houbo unhas reunións cos sindicatos, nas reunións, na Mesa Xeral de Negociación foi aprobado por unanimidade de todos os membros dos sindicatos, e foi mesmo aprobado que se comezase polo que é o edificio central, xa que se vai comezar o día 3 de maio o sistema de control horario, aínda que sexa en sistema de proba coa fichaxe, pediron, mesmo os propios sindicatos que o iniciara o que é os servizos centrais, o que é as oficinas centrais, onde hai máis traballadores, onde máis pode repercutir esa fichaxe para entrar aí.

Nos centros dependentes, como dicía o presidente, hai nalgúns centros que non se vai poder facer esa flexibilidade, entón haberá que mirar como se lle compensa a eses traballadores o que non poidan ter unha xornada flexíbel. Podemos pensar nos fogares infantís, que teñen que ter un horario e que non van poder ter un horario flexíbel, van ter que estar presentes todo o tempo. Entón, con acordo de todos os sindicatos decidiuse que se aprobara inicialmente e se tratara posteriormente cada centro, que se fora negociando o horario como se pode, nalgún caso se poida ir á flexibilidade, e naqueles casos onde é imposíbel buscar unha compensación, xa sexa económica, ou de tempo libre, que se poida dar aos traballadores para compensar que non poidan ter esa flexibilidade, e ese é o motivo. Eu imaxínome que a Xunta de Persoal o que quere é que veña todo, se viñese todo porque é máis complexo, sería imposíbel aplicar o día 3 de maio, que é cando comeza o control horario neste edificio, que vostedes comprobarán, e noutros edificios, que se puxeron xa uns sistemas de control de entrada neste, como noutros edificios. Entón, o maior número de funcionarios neste edificio, por iso se fai unha xornada flexíbel, entre as oito menos cuarto da mañá e as tres e media, sendo recuperábel ata as oito da tarde, é dicir, os traballadores teñen unha obriga, como dixo o presidente, de estar entre as 9 da mañá e

as 2 e media, e o resto da xornada ata completar as 37 horas e media de obrigado cumprimento da xornada laboral, poden escoller onde poden facer ese defecto de hora. Quítase a obrigatoriedade de traballar os sábados, polo tanto é un beneficio para os traballadores, aínda que se pon a xornada dos sábados, desde as 9 ata as 2 e media como xornada para recuperar o defecto de horas que fixesen, se non estiveron a traballar as 37 horas e media, é dicir, eu creo que é un beneficio para os traballadores, e así o entenderon eles, o deixalo sobre a mesa significaría que o día 3 de maio, cando comece o control horario non terían esa flexibilidade e non poderían recuperar e, polo tanto, iría un desconto na súa xornada, no seu salario, cando desta forma se lles permite poder recuperar o horario que non fixesen nun día por motivos de enfermidade, de demora ou simplemente por un accidente nunha estrada.

Eu creo que é beneficioso para os traballadores e así o entenderon na Mesa Xeral de Negociación, que foi aprobado por unanimidade dos sindicatos, outra cousa é a Xunta de Persoal, que reclama que siga aberto, de feito, efectivamente, como marca a lexislación, ten que seguirse negociando cos sindicatos centro por centro, porque cada centro é distinto.

Sr. Lamas Sánchez

Nosoutros non dubidabamos da vontade e que o acordo que se pretende sexa bo, o que pasa é que a información que nosoutros temos di claramente “Informar negativamente a proposta de modificación do réxime de horarios do persoal dos servizos centrais da Deputación provincial, por entender que se incumpre a lexislación vixente en materia de negociación, en canto a modificacións ao acordo negociado do persoal funcionario e ao convenio colectivo do persoal laboral, e por excluír ao persoal dos centros dependentes desta Deputación provincial”. Eu entendo que ao final pode ser unha cuestión de pequenos matices, e volvo a solicitar, o que entendo que é lóxico, porque estamos todos de acordo que a vontade de todos é aplicar esta nova modalidade en horarios e parécenos moi positivo o tema da flexibilidade, pero dalgunha forma, eu creo que cun pequeno esforzo poderíamos traer a un próximo Pleno un acordo total, porque eu creo que estamos realmente preto de que se poida conseguir este acordo.

Simplemente, reiterar que entendemos as explicacións e, no fondo, entendemos a bondade da medida e o que se pretende, pero seguimos pensando que é unha pena non poder conseguir un acordo total que eu creo que estamos preto de conseguilo, creo que sería un asunto ben recibido na casa por todo o persoal, e reiteramos a nosa solicitude de deixalo, xa sei que pode ter algunha dificultade, pero eu creo que é unha cuestión de días, e ao final o beneficio sería mellor para todos. Máis nada e moitas grazas.

Sra. Vázquez Veras

Para apoiar a decisión que se tomou na Comisión de Persoal do equipo de goberno de traer a este Pleno a modificación interna dos horarios, e insistindo moito que é para o edificio central e a flexibilidade que se contempla, que é exactamente a mesma flexibilidade que se contempla no Plan concilia, que está funcionando a nivel estatal, e que se recolle nas últimas modificacións lexislativas que se están facendo por parte do goberno galego, e que vai poder ser aplicado esperamos que para todos os funcionarios da Administración galega.

Direi que paralelamente esta proposta se levou a principios de xaneiro, retirouse para mellor estudo nunha Comisión de Traballo, volveuse a levar á Mesa de Negociación, paralelamente estamos cunha Comisión de Traballo para medidas de conciliación para a Deputación, que esperamos que proximamente se traian ao Pleno para redondear un pouco o que pode ser esta modificación horaria, e eu penso que a razón fundamental porque se trae esta aprobación é porque o día 3 vai comezar un control horario que, evidentemente, vai ser distinto se se aplica cunha flexibilidade ou non. Eu penso que nese sentido de que vai beneficiar aos traballadores que evidentemente é unha parte do cadro de persoal. Eu penso que iso ninguén se esquece deste tema, pero como comentaba o presidente da Comisión de Persoal, evidentemente hai moi distintas medidas que se poden tomar de conciliación e de flexibilidade no que é un traballo administrativo, que en centros onde se traballa a quendas, onde hai unha complicación, hai que estudar moi ben as medidas para que o persoal que traballa nos centros, cando menos, equipare os seus dereitos, aínda que non sexa flexibilidade horaria, con outras cousas que compense, como ben se dicía, esta flexibilidade.

Entón, eu penso que é máis o beneficio que se fai con este acordo plenario que non a retirada, porque entón habería un período onde o persoal tería que cumprir estritamente o asinado en convenio. E o acordo negociado de funcionarios e de persoal laboral, evidentemente vai ter que reflectir esta modificación, o que pasa é que o equipo de goberno entende que esa modificación se ten que facer no momento onde estea cerrado todo o traballo, é dicir, persoal funcionario de traballos administrativos e persoal de centros. Máis nada.

Sr. Nogueira Fernández.

Un pouco na liña da miña compañeira Margarida. Fíxese vostede que a proposta que vén ao Pleno non é a proposta de modificación de convenio que regula o horario desta Deputación, é a aplicación dun horario para os servizos centrais da Deputación. A modificación de convenio, como así figura nas actas que tivemos na Mesa de Negociación cos sindicatos, será cando estea o horario negociado con todos os Servizos da Deputación. É dicir, este simplemente para que teña efectos provisionais nos servizos centrais, e seguiremos negociando, como dixen antes, e dixo a compañeira, cos sindicatos. Foi unha decisión aceptada por todos os sindicatos e, polo tanto, retirala agora suporía un prexuízo para todos os traballadores, xa que contan con que entraría en vigor hoxe coa aprobación neste Pleno e, polo tanto, o día 3 cando comece o sistema de control nesta Deputación sería xa co novo horario e desta forma, se se retira para

unha posterior negociación, sería un prexuízo para eles, coa posterior negociación de convenio que se deixa para posterior.

A continuación vótase sobre a retirada do punto da orde do día:

VOTACIÓN

Votan a favor: 14 deputados (PP)

Votan en contra: 16 deputados (11 do PSOE e 5 do BNG)

Abstéñense: ningún deputado

Sométese a votación a aprobación do punto 17:

VOTACIÓN

Votan a favor: 16 deputados (11 do PSOE e 5 do BNG)

Votan en contra: ningún deputado

Abstéñense: 14 deputados (PP)

ACORDO

Apróbase o seguinte ditame da Comisión:

“Aproba-la modificación da regulación interna dos horarios de traballo do persoal desta Deputación provincial, de conformidade coas seguintes normas:

I)-XORNADA E HORARIO XERAIS.

1.- A duración máxima da xornada de traballo na Deputación Provincial da Coruña será a que en cada momento estea establecida pola normativa legal para a Administración xeral do Estado. Na actualidade, segundo o disposto na Resolución do 20/12/2005, da Secretaría Xeral para a Administración Pública (BOE nº 309, do 27/12/2005), está fixada en trinta e sete horas e media (37,5) semanais de traballo efectivo de termo medio no cómputo anual.

2. - Con carácter xeral, a xornada prestarase desde as 07:45 ata as 15:15 horas

3.- O persoal poderá flexibiliza-la súa xornada, sendo o horario xeral fixo de presenza nas oficinas de tódolos centros da Deputación Provincial da Coruña, que non teñan establecido outro horario especial, será de mañá e comprenderá desde as 9:00 ata as 14:30 horas de luns a venres. O tempo restante, ata completa-la xornada semanal, realizarase en horario flexible, entre as 7:30 e as 9:00 horas de luns a venres e entre as

14:30 e as 20:00 horas de luns a venres, así como nas mañás dos sábados, entre as 9:00 e as 14:00 horas, durante a mesma semana ou a inmediata seguinte, debéndolle comunicar previamente ó superior xerárquico os días e horas de recuperación.

II) XORNADA E HORARIOS ESPECIAIS.

1.- O persoal que teña asignada a especial dedicación terá que realizar unha xornada de traballo de corenta (40) horas semanais, sen prexuízo do aumento horario que ocasionalmente sexa necesario polas necesidades do servizo. Para estes efectos, o tempo restante, unha vez cumprido o horario fixo de presenza, terá que realizado en horario flexible nos intervalos fixados no apartado I.3 anterior.

2. - Nas oficinas de Rexistro e Información o horario fixo de presenza será de mañá e comprenderá o tempo de apertura do Rexistro. O tempo restante, ata completa-la xornada semanal, realizarase en horario flexible, entre as 7:30 e as 9:00 horas de luns a venres e entre as 14:30 e as 20:00 horas de luns a venres. Para compensa-lo tempo de traballo dos sábados, establecerase para todo o persoal administrativo da Sección unha contía retributiva fixa, como complemento de atención ó público incluído no específico.

3.- Entenderase como nocturno o horario de traballo comprendido entre as 22:00 horas dun día e as 6:00 horas do día seguinte. A xornada de traballo dos traballadores nocturnos non poderá exceder de oito (8) horas diarias de termo medio, nun período de referencia de quince (15) días. Os traballadores nocturnos non poderán realizar traballos fóra da xornada ordinaria e/ou horas extraordinarias.

III) DESCANSO E FESTIVOS.

1.- Todo o persoal terá dereito a un descanso mínimo semanal de día e medio ininterrompidos que, como regra xeral, comprenderá a tarde do sábado e o domingo.

2.- Nos centros nos que sexa necesaria a prestación dos servizos nos sábados, domingos e festivos, poderanse establece-las previsións necesarias para que os traballadores dispoñan do descanso semanal anticipadamente.

No complemento específico teranse en conta os factores de traballo en festivo e de turnicidade.

IV) XORNADA DE VERÁN.

Nos centros nos que sexa posible, tendo en conta as necesidades do servizo, no período comprendido entre os días 15 de xuño e 30 de setembro, ámbolos dous incluídos, reducirase a xornada diaria nunha hora, coa excepción da “Semana Grande”, no mes de

agosto, e os seus equivalentes en Santiago de Compostela e en Ferrol, durante a que se acurtará a xornada en tres horas.

V) MEDIDAS ADICIONAIS DE FLEXIBILIDADE HORARIA.

1.- Todo o persoal dispoñerá dun período de trinta minutos diarios de descanso, co carácter de non recuperable, dentro da xornada laboral, que non poderá afectar á prestación dos servizos e, como norma xeral, efectuarase entre as 10:00 e as 13:30 horas, ou entre as 18:00 e as 21:00 horas nas quendas de tarde.

3.- Aplicaranse as demais medidas adicionais de flexibilidade horaria e conciliación familiar que en cada caso estableza a propia Corporación, a normativa específica vixente da Comunidade Autónoma de Galicia e, supletoriamente, a normativa da Administración Xeral do Estado.

VI) XUSTIFICACIÓN DE AUSENCIAS.

1.- As ausencias e faltas de puntualidade e permanencia do persoal, nas que se aleguen causas de enfermidade, incapacidade temporal e outras de forza maior, requirirán o aviso inmediato ó responsable da unidade correspondente, así como a súa ulterior xustificación acreditativa no Servizo competente en materia de persoal. De non quedar debidamente xustificadas, darán lugar a unha dedución proporcional das retribucións, segundo o establecido no art. 36 da Lei 31/1991, do 30 de decembro, modificada polo art. 102.2 da Lei 13/1996, do 30 de decembro.

2.- En calquera caso, e polo que se refire á xustificación das baixas por incapacidade temporal, estarase ó disposto na Resolución da Presidencia do 28/01/2004, pola que se regula a presentación dos partes de baixa, confirmación e alta por incapacidade temporal do persoal da Deputación Provincial da Coruña (BOP nº 41, do 19/02/2004), sempre que esta alcance unha duración superior a tres días, e sempre sen prexuízo da facultade discrecional dos titulares das unidades administrativas de esixir en calquera momento a xustificación documental oportuna correspondente ó dito período de tres días.

O presente acordo implica a necesidade de modifica-los vixentes Acordo negociado de condicións de traballo do persoal funcionario e Convenio colectivo do persoal laboral desta Deputación.”

18.-MODIFICACIÓN DAS ESPECIFICACIÓNS DO PLAN DE PENSIÓNS.

INTERVENCIONS

Sr. Lamas Sánchez

Expresar o noso voto afirmativo desde o punto 18 incluído ata o punto 20.

ACORDO

Por unanimidade, apróbase o seguinte ditame da comisión:

“Aprobar a modificación das especificacións do Plan de pensións “**PERSOAL DA EXCMA. DEPUTACIÓN PROVINCIAL DA CORUÑA, PLAN DE PENSIONES**”, de conformidade coa redacción aprobada pola Comisión de Control do devandito plan, na súa reunión extraordinaria do día 17 do actual, cuxo texto íntegro se incorpora como anexo ao presente acordo.

ESPECIFICACIONES DO PLAN DE PENSIONES

“PERSOAL DA EXCMA. DEPUTACIÓN PROVINCIAL DA CORUÑA, PLAN DE PENSIONES”

ÍNDICE

I
DENOMINACIÓN, MODALIDADE E ADSCRICIÓN

II
ÁMBITO PERSOAL

III
DEREITOS E OBRIGAS DO PROMOTOR, DOS PARTICIPES E DOS BENEFICIARIOS

IV
RÉXIME DE ACHEGAS E PRESTACIONES

V
ORGANIZACIÓN E CONTROL

VI
MODIFICACIÓN E LIQUIDACIÓN

“Este Plan de pensións regularase por estas especificacións, polo Texto refundido da lei de regulación dos plans e fondos de pensións, aprobado polo Real decreto legislativo 1/2002, do 29 de novembro [BOE nº 13/12/2002], polo Real decreto 3 04/2004, do 20 de febreiro, polo que se aproba o Regulamento de plans e fondos de pensións e por cantas disposicións de calquera rango que, actualmente ou no futuro, poidan serlle de aplicación.

ESPECIFICACIONES DO PLAN DE PENSIONES

“PERSOAL DA EXCMA. DEPUTACIÓN PROVINCIAL DA CORUÑA, PLAN DE PENSIONES”

CAPITULO I

DENOMINACIÓN, MODALIDADE E ADSCRICIÓN

Artigo 1.- Denominación

Estas especificacións do Plan de pensións denominado "PERSOAL DA EXCMA. DEPUTACIÓN PROVINCIAL DA CORUÑA, PLAN DE PENSIONES", cuxo promotor é a EXCMA. DEPUTACIÓN PROVINCIAL DA

CORUÑA, regulan as relacións entre o mencionado plan, o seu promotor, os seus partícipes e os seus beneficiarios, cuxa condición leva implícita a aceptación de todas as normas nel contidas.

Artigo 2.- Modalidade

Este Plan de pensións configúrase como unha institución de previsión de carácter voluntario e libre que, en razón dos seus suxeitos constituíntes, encádrase na modalidade de SISTEMA EMPREGO e, en razón das obrigas estipuladas, na modalidade de ACHEGA DEFINIDA xa que contempla achegas definidas para as continxencias de xubilación, dependencia, falecemento e incapacidade.

No presente plan de pensións establécense dous colectivos:

COLECTIVO A no que se integran todos os funcionarios de carreira e persoal laboral fixo do cadro de persoal desde o momento en que adquiran tal condición.

COLECTIVO B no que se integran os funcionarios de emprego (persoal eventual e interino) e persoal laboral temporal desde o momento en que adquiran tal condición.

Artigo 3.- Adscrición a un fondo de pensións

1. O presente Plan de pensións integrarase no Fondo de Pensións CAIXA GALICIA VII, FONDO DE PENSIONES, inscrito na Dirección Xeral de Seguros co nº F-1015.

2. As achegas do promotor e se é o caso dos partícipes integraranse inmediata e obrigatoriamente no mencionado fondo de pensións. As devanditas achegas, xunto cos seus rendementos netos e os incrementos patrimoniais que xeren, aboaranse na conta de posición que o plan manteña no fondo. O pagamento das prestacións correspondentes, así como os gastos adicionais que se producisen, efectuarase con cargo á citada conta.

CAPITULO II ÁMBITO PERSOAL

Artigo 4.- Suxeitos constituíntes

Son suxeitos constituíntes deste Plan de pensións:

- a) A EXCMA. DEPUTACIÓN PROVINCIAL DA CORUÑA, como promotora do plan.
- b) Os partícipes, en cuxo interese se crea o plan.

Artigo 5.- Elementos persoais

Son elementos persoais deste Plan de pensións:

- a) Os suxeitos constituíntes.
- b) Os beneficiarios.

Artigo 6.- Partícipes

Poderán ser partícipes do Plan de pensións o persoal do promotor pertencente a algún dos colectivos contemplados no artigo 2 destas especificacións que lle manifeste á promotora a súa vontade de se integrar nel, desde o momento da súa constitución, e teñan capacidade de se obrigar nos termos establecidos no Texto refundido da lei de regulación dos plans e fondos de pensións, aprobado polo Real decreto legislativo 1/2002, do 29 de novembro, e disposicións complementarias ou substitutorias, sempre e cando acepten na súa totalidade e sen limitación algunhas especificacións deste plan e as normas de funcionamento do seu correspondente fondo.

Poderán incorporarse en calquera momento posterior aqueles que reúnan eses mesmos requisitos e lle manifesten á promotora a súa vontade de se integrar no plan.

A incorporación ao Plan de pensións producirase mediante a subscripción individual dun boletín de adhesión a este, de acordo co modelo acordado para tal fin pola Comisión de Control do Plan de pensións ou mediante escrito dirixido á promotora manifestando a súa vontade de se adherir ao plan.

Considéranse empregados da promotora, aos traballadores por conta allea ou asalariados, en concreto, ao persoal vinculado á promotora por relación laboral, incluído o persoal con relación laboral de carácter especial independentemente do réxime da seguridade social aplicábel, así como, se é o caso, ao persoal das administracións e entes públicos promotores

vinculado por relación de servizos dependente regulada en normas estatutarias ou administrativas

Artigo 7.- Partícipes en suspenso

1. Consideraranse partícipes en suspenso aqueles que non efectúen achegas directas nin imputadas ao plan.

2. As situacións que determinarán a suspensión das achegas do promotor en favor de partícipes pertencentes ao colectivo A son as seguintes:

A promotora non realizará achegas a favor daqueles partícipes pertencentes ao Colectivo A que se encontren nas seguintes situacións:

▫Extinción da relación funcionarial ou laboral co promotor.

▫Servizo noutras Administracións públicas.

▫Excedencia voluntaria por:

Prestación de servizos no sector público.

Interese particular.

Incentivada no marco dun plan de emprego para a redistribución de efectivos.

▫Suspensión de funcións, tanto provisional como firme, como consecuencia de condena criminal ou sanción disciplinaria. No caso en que se desestime a suspensión de funcións, o promotor procederá a rehabilitar as achegas do partícipe, con efectos retroactivos ao momento da suspensión.

3. Non se suspenderán as achegas do promotor en favor de partícipes pertencentes ao colectivo A nas seguintes situacións:

▫Servizos especiais.

▫Servizo activo.

▫Expectativa de destino.

▫Excedencia forzosa.

▫Excedencia por coidado de fillos (incluído por acollemento).

4. Ningún dos supostos de permisos, licenzas nin vacacións suspenderán tampouco as achegas da promotora en favor de partícipes pertencentes ao colectivo A.

5. No caso de que a promotora non realice achegas a favor dun partícipe pertencente ao colectivo A por se encontrar nalgunha das situacións recollidas no apartado 2) deste artigo, ao dito partícipe suspenderánselle de forma automática as achegas de carácter voluntario que se lle descontan en nómina pero poderá seguir efectuando achegas voluntarias a través de cargo en conta.

Só no caso de que non realice ningunha achega pasará a partícipe en suspenso.

No caso en que se rehabiliten as achegas obrigatorias do promotor a un partícipe pertencente ao colectivo A tras a súa suspensión, activaranse de forma automática as achegas de carácter voluntario a través do desconto en nómina que o partícipe establececese no seu día.

Non obstante, en caso de extinción da relación laboral co promotor o partícipe estará obrigado a mobilizar o seu dereito consolidado a outro plan de pensións nun prazo máximo de 3 meses.

6. Os partícipes en suspenso manterán os seus dereitos no plan.

Artigo 8.- Beneficiarios

Serán beneficiarios do plan aquelas persoas físicas que, tendo sido ou non partícipes del, teñan dereito á percepción de prestacións.

Artigo 9.- Alta dun partícipe no plan

1. quen se ache en condición de se acoller ao plan conforme ao disposto no artigo 6 destas especificacións, poderá exercer o seu dereito de adhesión causando alta no plan desde o momento en que lle comunique por escrito ao promotor que exercita o mencionado dereito.

As adhesións subministrarán efecto o día en que se realice a primeira achega (directa ou imputada) ou en que se realice un traspaso de dereitos consolidados desde outro plan de pensións.

2. Os dereitos dos partícipes no plan considéranse desde a data efectiva da adhesión, é dicir, na data en que, tras comunicar a súa vontade de adhesión ao plan, se realice a primeira achega (directa ou imputada) ou se efectúe un traspaso de dereitos consolidados.

Non obstante o anterior, en relación coas achegas do promotor destinadas aos partícipes pertencentes ao colectivo A do plan (persoal funcionario de carreira e persoal laboral fixo do cadro de persoal) que se adherisen ao plan de pensións nun momento posterior á súa constitución, a Deputación provincial non realizará achegas, por eses novos partícipes, ata o ano natural inmediato seguinte á data en que este manifeste o seu desexo de incorporación.

3. Ao partícipe expediráselle un certificado acreditativo da súa pertenza e integración ao Plan de pensións. Este certificado, que expedirán conxuntamente a entidade xestora e a entidade depositaria, non será transferíbel.

Artigo 10.- Baixa dun partícipe no plan

Os partícipes causarán baixa no plan:

- a) Cando se produza algunha das continxencias previstas no plan.
- b) Cando cesa definitivamente a relación funcional e laboral co promotor e traslada os seus dereitos consolidados. En tanto non se produce o dito traslado mantense de alta no plan como partícipe en suspenso.
- c) Por terminación do plan, procederase a transferir os seus dereitos consolidados a outro Plan de pensións.
- d) Cando, nos supostos de enfermidade grave e desemprego de longa duración regulados no Regulamento de plans e fondos de pensións, a totalidade do dereito consolidado se faga efectivo ao partícipe.

Artigo 11.- Alta dun beneficiario no plan

Adquirirán a condición de beneficiarios:

a) Os partícipes que exerzan o dereito a percibir a prestación que lles corresponda por algunha das seguintes continxencias:

-Xubilación.

-Incapacidade: incapacidade permanente total para a profesión habitual, incapacidade permanente absoluta para todo traballo ou gran invalidez, determinadas conforme ao réxime correspondente da Seguridade Social.

-Dependencia severa ou gran dependencia.

b) As persoas físicas que exerzan o dereito a percibir prestacións de viuvez, orfandade ou en favor doutros herdeiros ou persoas designadas por falecemento dun partícipe, segundo a última designación de beneficiarios efectuada por este.

A falta de designación expresa por parte do partícipe, serán beneficiarios, por orde preferente e excluínte:

1. O cónxuxe do partícipe, non separado legalmente.
2. Os fillos do partícipe por partes iguais.
3. Os pais do partícipe por partes iguais.
4. Os irmáns do partícipe por partes iguais.
5. Os herdeiros legais.

En defecto dos anteriores, o dereito económico acrecerá a conta de posición do plan

c) As persoas físicas que, por falecemento dun beneficiario, exerzan o dereito a percibir prestacións de viuvez, orfandade ou en favor doutros herdeiros ou persoas designadas cando o beneficiario falecido estivese a cobrar unha modalidade de prestación reversíbel.

Artigo 12.- Baixa dun beneficiario no plan

Os beneficiarios que cobren prestacións en forma de renda causarán baixa no plan en caso de falecemento ou cando esta se esgote no caso de rendas temporais ou cobro en forma de capital.

CAPITULO III

DEREITOS E OBRIGAS DO PROMOTOR, DOS PARTICIPES E DOS BENEFICIARIOS

Artigo 13.- Dereitos do promotor

Correspóndenlle ao promotor do plan os seguintes dereitos:

- a) Ter a súa representación na Comisión de Control do Plan de Pensións nos termos que se prevean no capítulo V das presentes especificacións.
- b) Solicitar dos partícipes os datos persoais e familiares necesarios para determinar as súas achegas ao plan.
- c) Ser informado da evolución financeira e actuarial do Plan de pensións.
- d) Exercitar os restantes dereitos establecidos nas presentes especificacións e na lexislación vixente.

Artigo 14.- Obrigas do promotor

Será obriga do promotor:

- a) Efectuar o desembolso das achegas imputábeis aos partícipes, dispostas nas presentes especificacións na forma, prazos e contía comprometidas.
- b) Así mesmo, deberá facilitar os datos que, sobre o persoal, lle sexan requiridos con obxecto de realizar as correspondentes valoracións actuariais.
- c) Ademais, deberá detraer nas nóminas as achegas periódicas voluntarias que os partícipes establecesen baixo este sistema de achegas e transferilas á conta que o fondo manteña na entidade depositaria.
- d) Comunicar as altas e baixas dos partícipes e as variacións que se produzan e afecten ao funcionamento do Plan de pensións.
- e) Asumir os gastos de funcionamento imputábeis ao plan mediante o desembolso de achegas extraordinarias nas contías que correspondan.

Articulo 15.- Dereitos dos partícipes

Son dereitos dos partícipes do plan os seguintes:

- a) A titularidade dos recursos patrimoniais nos que, a través do correspondente fondo, se materialice e instrumente o Plan de pensións.
- b) Os seus dereitos consolidados individuais constituídos pola súa cota parte do fondo de capitalización que teña o plan no fondo de pensións correspondente. Este fondo de capitalización estará formado polas achegas e rendas xeradas polos recursos investidos menos os quebrantos e gastos que se producisen.

Os dereitos consolidados só se farán efectivos nos casos dispostos nestas especificacións para a súa integración noutro Plan de pensións, ou nos casos recollidos no apartado h) deste artigo.

- c) Mobilizar a outro Plan de pensións os seus dereitos consolidados, minorados, se é o caso, nos gastos que permita a normativa vixente en cada momento, nas seguintes circunstancias:

- Por cesación definitiva da súa relación de emprego co promotor.
- Por terminación do plan.

A solicitude de mobilización deberáselle notificar por escrito á entidade xestora do fondo no que estea integrado o plan, indicando o novo Plan de pensións no que se integra e acompañando dunha certificación emitida pola entidade xestora do fondo de pensións ao que pertenza este novo plan na que conste que se acepta a dita integración. Xunto coa mobilización dos recursos económicos a entidade xestora de orixe deberá trasladar á de destino toda a información relevante do partícipe, debendo comunicar a este o contido da antedita información.

A transferencia dos dereitos consolidados do partícipe ao novo plan efectuarase nun prazo máximo dun mes ou aquel que determine a normativa vixente en cada momento, desde a recepción pola entidade xestora de toda a documentación anterior.

En caso de cesamento definitivo da relación funcional ou laboral a mobilización será obrigatoria nun prazo máximo de 3 meses. Se neste prazo o partícipe non comunicou o plan ao que quere mobilizar, a entidade xestora, logo da comunicación e requirimento da dita entidade cunha antelación mínima de 15 días ao prazo mencionado, transvasarao ao Plan de pensións establecido na disposición adicional única destas especificacións.

d) Participar, a través da Comisión de Control do plan, na supervisión do funcionamento e xestión deste, mediante a elección dos seus membros e, se é o caso, asumindo a condición de presidente, secretario ou vogal da citada Comisión.

e) Designar beneficiarios para o caso de que se produza a continxencia de falecemento. Así mesmo poderá cambiar a citada designación en tanto sexa partícipe do plan.

f) Estar informados sobre a evolución do plan. A información mínima que recibirá cada partícipe, de forma gratuíta, será:

1. Con ocasión da incorporación ao Plan de pensións, o partícipe que o solicite deberá recibir un certificado de pertenza emitido pola entidade xestora.

2. Faráselle entrega, se así o solicita, dun exemplar das presentes especificacións como documentación acreditativa dos seus dereitos e obrigas. Se ben, estarán á súa disposición, en todo momento, na sede da entidade promotora.

3. Porase ao dispor do partícipe un exemplar da declaración dos principios da política de investimento do fondo de pensións no que estea integrado o plan, á que se poderá acceder a través da rede de oficinas da entidade depositaria ou ben na entidade xestora.

4. Anualmente, remitirase a cada partícipe unha certificación sobre as achegas, directas ou imputadas, realizadas en cada ano natural e o valor dos seus dereitos consolidados a 31 de decembro de cada ano.

5. Con carácter trimestral, facilitarase información sobre a evolución e situación dos seus dereitos consolidados no plan, así como outros puntos que puidesen afectar, especialmente, modificacións normativas, cambios nas presentes especificacións, normas de funcionamento do fondo ou da súa política de investimentos, e das comisións de xestión e depósito.

6. Un caderno individualizado do Plan de pensións ou outro soporte informativo similar.

Así mesmo, porase a disposición dos partícipes a través da rede de oficinas da entidade depositaria e/ou xestora a totalidade dos gastos do fondo na parte que sexan imputábeis ao plan expresados en porcentaxe sobre a conta de posición.

Así mesmo, garantirase o acceso gratuíta á información individualizada correspondente a cada partícipe sobre a evolución, situación e valoración diaria dos seus dereitos consolidados e as súas achegas ao Plan de pensións.

g) Solicitar ao fondo no que estea integrado o seu Plan de pensións, a través da súa entidade xestora, que se fagan efectivos os seus dereitos consolidados na súa totalidade ou en parte, con carácter excepcional, nos supostos de enfermidade grave e desemprego de longa duración de acordo co establecido na lexislación vixente.

h) Realizar calquera consulta individualizada sobre o plan e fondo de pensións.

Artigo 16.- Obrigas dos partícipes

Son obrigas dos partícipes:

a) Comunicarlle á entidade xestora do fondo os datos persoais e familiares que lle sexan requiridos para causar alta no plan e para determinar o cobro das prestacións. Así mesmo, deberá comunicar calquera modificación que se produza nos ditos datos.

b) Efectuar o desembolso das achegas voluntarias establecidas a través da modalidade de cargo en conta na forma, prazos e contía comprometidas.

c) Permitir, que o promotor detraia da súa nómina as achegas voluntarias ao Plan de pensións correspondentes, se é o caso, ao partícipe

Artigo 17.- Dereitos dos beneficiarios

Correspondenlles aos beneficiarios do plan os seguintes dereitos:

a) A titularidade dos recursos patrimoniais nos que, a través do correspondente fondo, se materialice e instrumente o seu Plan de pensións.

b) Ter a súa representación na Comisión de Control do Plan de pensións nos termos dispostos nas disposicións legais e o capítulo V das presentes especificacións.

c) Percibir as prestacións que lles correspondan ao producírense as continxencias establecidas no plan.

d) Recibir da entidade xestora unha certificación das prestacións cobradas, así como das retencións practicadas a conta.

e) Así mesmo, e con periodicidade anual, remitiráselle unha certificación sobre o valor dos seus dereitos económicos no plan a 31 de decembro

f) Producida e comunicada a continxencia, o beneficiario do Plan de pensións deberá recibir información apropiada sobre a prestación e as súas posibles reversións, sobre as opcións de cobro correspondentes, se é o caso, e respecto do grao de garantía ou do risco de conta do beneficiario. Se é o caso, faráselle entrega ao beneficiario do certificado de seguro ou garantía da súa prestación emitida pola entidade correspondente.

g) Con carácter trimestral, facilitarase información sobre a evolución e situación dos seus dereitos económicos no plan, así como outros puntos que puidesen afectar, especialmente, modificacións normativas, cambios nas presentes especificacións, normas de funcionamento do fondo ou da súa política de investimentos, e das comisións de xestión e depósito.

Artigo 18.- Obrigas dos beneficiarios

Son obrigas dos beneficiarios:

a) O beneficiario do Plan de pensións ou o seu representante legal, deberá solicitar a prestación sinalando, se é o caso, a forma escollida para o seu cobro e presentar a documentación acreditativa da continxencia.

b) Notificarlle á entidade xestora os datos persoais e familiares que lle sexan requiridos para xustificar o dereito á percepción das prestacións e do seu mantemento ao longo do tempo.

Artigo 19.- Protección de datos

Para os efectos do establecido na vixente normativa sobre protección de datos de carácter persoal, os partícipes e beneficiarios causados autorizan coa sinatura do correspondente boletín de adhesión ou solicitude de prestación a que os seus datos persoais (mesmo os de saúde) facilitados ao promotor ou, se é o caso, á entidade xestora e/ou aseguradora, sexan incluídos nun ficheiro, e ao seu tratamento posterior, á ser preceptiva a súa cumprimentación para valorar e acoutar o risco e, en consecuencia, para o inicio e desenvolvemento da relación xurídica, sendo destinataria e responsábel do ficheiro a entidade xestora, BIA GALICIA DE SEGUROS Y REASEGUROS, S.A., con domicilio na R/ Picavía, 8-1º esquerda-15004-A Coruña á que os partícipes e beneficiarios poderán dirixirse para exercitar os dereitos de acceso, rectificación, cancelación e oposición ao seu tratamento. Por último, outorgan, o seu consentimento expreso para que os ditos datos lle sexan comunicados á Comisión de Control do Plan de Pensións, para os exclusivos efectos de que esta poida desenvolver as funcións que se lle encomendan na normativa vixente. Idéntico consentimento, e para os mesmos efectos, outorgan os partícipes e beneficiarios do Plan de pensións respecto da entidade depositaria, sen prexuízo ningún do que adicionalmente en cada momento teñan expresado en favor da dita entidade por razón das relacións de calquera outra natureza que manteñan con ela.

CAPITULO IV RÉXIME DE ACHEGAS E PRESTACIÓNS

Artigo 20.- Sistema de financiamento do plan

1. O sistema financeiro-actuarial que adoptará o presente plan será a "CAPITALIZACIÓN FINANCEIRA INDIVIDUAL".

2. O valor dos dereitos consolidados dos partícipes determínase como, a cota parte do fondo de capitalización, constituído polas achegas definidas para xubilación, falecemento e

invalidez, directas e imputadas, dos partícipes, e os rendementos netos de gastos que estes xeren. Igual definición aplicarase para os dereitos consolidados dos partícipes en suspenso.

3. O Plan de pensións non asume a cobertura de ningún risco relacionado coas prestacións previstas, nin tampouco garante un xuro mínimo aos partícipes.

Cando se devenguen prestacións en forma de renda que supoña a asunción dalgún tipo de risco o plan contratará o aseguramento das devanditas prestacións cunha entidade aseguradora, mediante a correspondente póliza, cuxo tomador será o Plan de pensións representado polo presidente da Comisión de Control.

O valor dos dereitos económicos dos beneficiarios que opten pola percepción das súas prestacións en forma de renda asegurada coincidirá co valor de provisiones matemáticas que o asegurador manteña constituídas polo beneficiario.

Artigo 21.- Achegas ao plan

1. Unicamente poderán realizar achegas ao Plan de pensións:

- os partícipes.
- o promotor.

Estas achegas terán carácter irrevogábel desde o momento do seu pagamento.

As achegas efectuadas ao plan integraranse necesariamente na conta que o fondo manteña na entidade depositaria á data do seu pagamento.

2. Achegas dos partícipes:

As achegas dos partícipes terán carácter voluntario e poderán ser:

a) **ACHEGA INICIAL VOLUNTARIA.** Cada partícipe, xa sexa do colectivo A ou B, fixará, de forma individual, a achega voluntaria inicial que desexe efectuar ao Plan de pensións, ingresándoo, neste suposto, na forma que conveña coa entidade xestora.

O importe desta achega será como mínimo de 60 euros.

b) **ACHEGAS PERIÓDICAS VOLUNTARIAS A TRAVÉS DE DESCONTO MENSUAL EN NÓMINA:** O partícipe, xa sexa do colectivo A ou do colectivo B, determinará de forma individual e voluntaria a achega mensual que desexe realizar ao Plan de pensións. Esta achega seralle detraída da nómina mensualmente polo promotor, quen efectuará o seu aboamento na conta que o fondo manteña na entidade depositaria. Para iso, con carácter anual, deberalle comunicar ao Servizo de Persoal da Deputación provincial antes do 5 de decembro de cada exercicio e con efectos do 1 de xaneiro a 31 de decembro do exercicio seguinte a contía da achega escollida.

c) **ACHEGAS PERIÓDICAS VOLUNTARIAS A TRAVÉS DE CARGO EN CONTA DO PARTICIPE TITULAR DO PLAN.** O partícipe, xa sexa do colectivo A ou do colectivo B, determinará de forma individual a achega que desexe realizar ao Plan de pensións así como a periodicidade con que desexa efectualala (mensual, trimestral, semestral ou anual).

Esta achega, cuxo importe será como mínimo equivalente a 360 euros anuais, será realizada directamente polo partícipe a través do cargo na conta que designe (PODERÁ SER UNHA CONTA ABERTA NA ENTIDADE DEPOSITARIA OU EN CALQUERA OUTRA ENTIDADE FINANCEIRA).

d) **ACHEGAS EXTRAORDINARIAS ADICIONAIS.** Son aquelas que o partícipe, xa sexa do colectivo A ou do colectivo B, pode realizar á súa vontade, de forma única ou non, e sen necesidade de se acoller a ningunha frecuencia ou contía preestabelecida. A decisión de efectuar o pagamento de achegas extraordinarias será comunicada polo partícipe á entidade xestora do fondo mediante o correspondente boletín, e o ingreso da cantidade correspondente na conta do fondo. O importe mínimo da achega extraordinaria será de 150 euros.

3. *Achegas do promotor:*

O promotor contribuirá ao Plan de pensións coas seguintes achegas:

a) **ACHEGA INICIAL:** O promotor efectuará unha achega inicial correspondente ao orzamento do exercicio 2002, pola cantidade que figura na partida orzamentaria correspondente a distribuír a partes iguais entre todos os partícipes pertencentes ao colectivo A do plan

(persoal funcionario de carreira e persoal laboral fixo do cadro de persoal) que manifestasen a súa vontade de adhesión ao plan desde a súa constitución.

b) ACHEGAS REGULARES ANUAIS: Para anualidades sucesivas o promotor efectuará:

b.1) Achegas anuais regulares a distribuír a partes iguais entre os partícipes pertencentes ao colectivo A do plan (persoal funcionario de carreira e persoal laboral fixo do cadro de persoal) que estean en activo a 31 de decembro do ano anterior ao exercicio correspondente. O citado pagamento farao efectivo, a entidade promotora, dentro dos tres primeiros meses de cada exercicio.

A contía desta contribución anual regular do promotor virá determinada polo crédito consignado no orzamento do exercicio correspondente e os incrementos que mediante modificacións de crédito aproben o órgano competente da Corporación provincial. Todo iso, sen prexuízo da revisión á alza das ditas cantidades por acordo do Pleno da Corporación ou órgano competente da Corporación provincial.

O importe inicial do crédito consignado no orzamento do exercicio correspondente destinarase á realización das achegas anteriores.

b.2) En relación cos partícipes pertencentes ao colectivo A do plan (persoal funcionario de carreira e persoal laboral fixo do cadro de persoal) que adquiran tal condición nun momento posterior á constitución deste, a Deputación provincial non realizará achegas, por eses novos partícipes, ata o ano natural inmediato seguinte á súa data de adhesión ao plan.

A Deputación provincial realizará as modificacións de crédito necesarias para a realización e pagamento das achegas anteriores, que terán carácter adicional ás indicadas no apartado b.1) anterior.

c) ACHEGAS EXTRAORDINARIAS ADICIONAIS: O promotor efectuará ao Plan de pensións as achegas extraordinarias mencionadas no apartado e) do artigo 14 destas especificacións ou outras que se acorden no Pleno da Deputación provincial ou órgano competente da Corporación.

As achegas extraordinarias adicionais da Deputación provincial repartiranse a partes iguais entre todos os partícipes do Plan de pensións pertencentes ao colectivo A do plan (persoal funcionario de carreira e persoal laboral fixo do cadro de persoal) mencionado no artigo 2 das presentes especificacións. Non obstante, o reparto das achegas extraordinarias mencionadas no apartado e) do artigo 14 das presentes especificacións, destinadas á asunción de gastos de funcionamento imputábeis ao plan polo promotor, efectuarase entre todos os partícipes do Plan de pensións pertencentes ao colectivo A e B do plan, en proporción á contía dos dereitos consolidados medios individualizados de cada partícipe no exercicio anterior.

A contía das achegas anuais sucesivas da Deputación provincial, mencionadas no apartado b) anterior, garantirán unha achega mínima por cada partícipe nunha contía non inferior á que resulte do reparto individual da achega inicial da Deputación provincial mencionada no apartado a) anterior.

4. O cumprimento dos anteriores compromisos de achegas por parte do promotor queda supeditado á existencia e dispoñibilidade de crédito adecuado e suficiente e á súa aprobación polo órgano competente.

No proxecto de orzamento da Deputación Provincial da Coruña figurarán os créditos necesarios para garantir o pagamento das achegas do promotor nas contías mínimas indicadas nos parágrafos anteriores.

5. Os partícipes poderán combinar, tanto ao causar alta no plan como durante a súa permanencia nel, os ditos sistemas de achegas.

6. O traspaso ao plan dos dereitos consolidados doutros Plans de pensións non ten o carácter de achega, mantendo, non obstante, a súa natureza de dereito consolidado.

Artigo 22.- Contía máxima das achegas

1. Dentro de cada ano natural, a contía máxima das achegas ao plan tanto directas como imputadas a un partícipe non poderán exceder os límites máximos de achega establecidos, con carácter xeral e en función da idade, no Texto refundido da lei ou en disposición con rango de lei que modifique os citados límites.

O límite máximo legal para as achegas directas do partícipe ao plan non afecta ao traspaso de dereitos consolidados provenientes doutro Plan de pensións.

2. Se a acumulación das achegas directas ao plan realizadas polo partícipe con outras realizadas polo propio partícipe a outro ou outros plans de pensións superase o límite máximo legal para achegas directas, o partícipe terá que retirar os excesos de achegas do outro plan ou plans.

Para tal fin, o partícipe comunicarlle á entidade xestora as achegas realizadas por este a outros plans de pensións cuxa entidade xestora non sexa a mesma que a deste fondo de pensións.

3. A entidade xestora queda autorizada a suspender para un partícipe, dentro de cada ano natural, o réxime de pagamento das achegas periódicas a vencer ou a non tramitar modificacións a este ou novas achegas extraordinarias cando co novo pagamento, xunto coas achegas xa efectuadas por el no ano natural, se supere o mencionado límite, informando diso ao partícipe.

Artigo 23.- Modificación, suspensión e rehabilitación de achegas

1. Modificación:

Mediante comunicación escrita dirixida á entidade xestora con quince días naturais de preaviso antes da data habitual do cargo en conta, o partícipe poderá modificar o seu sistema de achegas voluntarias a través do cargo en conta en canto a importe, periodicidade ou crecemento delas, sen efecto retroactivo.

As achegas voluntarias establecidas a través de desconto en nómina establecidas para un determinado exercicio só se suspenderán no caso de que o promotor suspenda as achegas a favor dun partícipe pertencente ao colectivo A por algunha das situacións recollidas no artigo 7.2 destas especificacións ou exista algún suposto que impida a correspondente detracción de nómina.

2. Suspensión:

Cando o promotor suspenda as achegas a favor dun partícipe pertencente ao colectivo A por algunha das situacións recollidas no artigo 7.2. destas especificacións ao mencionado partícipe suspenderánselle de forma automática as achegas de carácter voluntario que se lle descontan en nómina pero poderá seguir efectuando achegas voluntarias a través do cargo en conta. Só no caso de que non realice ningunha achega pasará a partícipe en suspenso mantendo os seus dereitos consolidados no plan.

No caso de extinción da relación funcionario ou laboral, o partícipe deberá solicitar o traslado dos seus dereitos a outro plan nun prazo máximo de 3 meses. Se neste prazo o partícipe non comunicou o plan ao que se quere mobilizar, a entidade xestora, logo da comunicación e requirimento da dita entidade cunha antelación mínima de 15 días ao prazo mencionado, transvasaráo ao plan de pensións establecido na disposición adicional única destas especificacións.

3. O partícipe pode rehabilitar en calquera momento o pagamento de achegas voluntarias a través do cargo en conta, suspendido previamente, mediante trámite similar ao establecido para a incorporación de altas ao plan. No caso en que se rehabiliten as achegas obrigatorias do promotor a un partícipe pertencente ao colectivo A tras a súa suspensión, activaranse de forma automática as achegas de carácter voluntario a través do desconto en nómina que o partícipe establececese no seu día.

Artigo 24.- Non pagamento de achegas

No caso de non pagamento das achegas do promotor, a entidade xestora do fondo comunicarllo á Comisión de Control do Plan para que realice os trámites que considere oportunos.

Artigo 25.- Devolución de achegas

A entidade xestora do fondo poderalle devolver ao partícipe parte das achegas xa pagadas, aboándollas na conta respectiva, nos seguintes casos:

a) Cando o conxunto das achegas directas dun partícipe a Plans de pensións supere nun ano natural o límite máximo legal para achegas directas.

O partícipe deberá xustificarlle á entidade xestora a superación do citado límite mediante as certificacións emitidas por aquelas entidades xestoras de fondos de pensións nos que se produciron as achegas que en conxunto orixinan a superación do límite.

Os excesos que se produzan sobre a achega máxima establecida poderanse retirar antes do 30 de xuño do ano seguinte, sen aplicación da sanción disposta no artigo 36.4 do Texto refundido da lei de plans e fondos de pensións

En ningún caso o pagamento da devolución de achegas terá data de valor retroactiva.

A devolución realizarase polo importe efectivamente achegado en exceso, con cargo ao dereito consolidado do partícipe. A rendibilidade imputábel ao exceso de achega acrecerá ao patrimonio do fondo de pensións se fose positiva, e será de conta do partícipe se resultase negativa.

b) Por erros no proceso de cobramento de achegas:

Cando como consecuencia de erros no proceso administrativo de cobro de achegas, ou dea súa modificación ou suspensión, resultasen indebidamente cargadas achegas nas contas dos partícipes, logo da solicitude destes, a entidade xestora tramitará a súa devolución, sen xuros.

Considerarase que se derivan de erro administrativo as achegas que puidesen cargarse na conta do partícipe durante o período que medie entre o acacemento dunha continxencia e a súa comunicación á entidade xestora do fondo en que se encontre integrado o Plan de pensións, agás indicación en contrario por parte do partícipe.

c) Por traslado de dereitos consolidados a outro plan:

Cando un partícipe solicitase un traslado a outro plan e tivese unha cota periódica pendente de cargo, esta poderase devolver, non incluíndose esta no importe de traslado, en prol de axilizar o proceso de mobilización.

Artigo 26 - Continxencias cubertas polo plan

As continxencias cubertas polo presente Plan de pensións, que dan orixe ao pagamento de prestacións, son as seguintes:

a) *xubilación*.

Para a determinación desta continxencia estarase ao disposto no réxime de seguridade social correspondente. A continxencia de xubilación entenderase producida cando o partícipe acceda efectivamente á xubilación no réxime da seguridade social correspondente sexa á idade ordinaria, anticipada ou posteriormente.

Cando non sexa posíbel o acceso dun partícipe á xubilación, a continxencia entenderase producida a partir da idade ordinaria de xubilación no réxime xeral da seguridade social, no momento no que o partícipe non exerza ou cesase na actividade laboral ou profesional, e non estea cotizando para a continxencia de xubilación para ningún réxime da seguridade social. Non obstante, poderá anticiparse a percepción da prestación correspondente a partir dos 60 anos de idade, nos seguintes supostos:

a) Que cesase en toda actividade determinante da alta na seguridade social sen prexuízo de que, se é o caso, continúe asimilado á alta nalgún réxime da seguridade social.

b) Que no momento de solicitar a disposición anticipada non reúna aínda os requisitos para a obtención da prestación de xubilación no réxime da seguridade social correspondente.

A partir do acceso á xubilación, o partícipe poderá seguir realizando achegas ao Plan de pensións. Non obstante, unha vez iniciado o cobramento da prestación de xubilación, as achegas só poderán destinarse ás continxencias de falecemento e dependencia. O mesmo réxime aplicarase, cando non sexa posíbel o acceso á xubilación, ás achegas que se realicen a partir da idade ordinaria de xubilación ou a partir do cobro anticipado da prestación correspondente e no suposto de xubilación parcial.

Aqueles partícipes que, conforme ao réxime da seguridade social, estean en situación de xubilación parcial poderán realizar achegas para a xubilación total ou ben cobrar a prestación con motivo da xubilación parcial.

b) *Incapacidade permanente total para a profesión habitual, incapacidade permanente absoluta para todo traballo ou gran invalidez*, determinadas conforme ao réxime correspondente da seguridade social.

c) *Dependencia severa ou gran dependencia* do partícipe regulada na Lei 39/2006, do 14 de decembro, de promoción da autonomía persoal e atención ás persoas en situación de dependencia.

d) *O falecemento do partícipe* por calquera causa. Esta continxencia acreditarase mediante o correspondente certificado de defunción.

e) *O falecemento dun beneficiario* por calquera causa que, en función da modalidade de prestación que previamente se definise, xere o dereito á prestación a favor do seu cónxuxe, fillos, herdeiros ou persoas designadas polo beneficiario. Esta continxencia acreditarase mediante o correspondente certificado de defunción.

Artigo 27.- Prestacións do plan

As prestacións previstas polo plan para cada unha das continxencias cubertas por este, serán as seguintes:

- a) Para a continxencia de xubilación: prestación de xubilación.
- b) Para a continxencia de invalidez: prestación de incapacidade.
- c) Para a continxencia de dependencia: prestación de dependencia.
- c) Para a continxencia de falecemento: prestación por falecemento.

Artigo 28.- Prestación de xubilación

O importe desta prestación será igual á cota parte que ao partícipe, na data da súa liquidación, lle corresponda do fondo de capitalización que se constituirá para esta prestación coas achegas definidas indicadas no artigo 20 das presentes especificacións máis os rendementos, netos de gastos, que estas xeren no fondo.

Artigo 29.- Prestación de incapacidade

O importe desta prestación será igual á cota parte que ao partícipe, na data da súa liquidación, lle corresponda do fondo de capitalización que se constituirá para esta prestación coas achegas definidas indicadas no artigo 20 das presentes especificacións, máis os rendementos, netos de gastos, que estas xeren no fondo.

Artigo 30. - Prestación de dependencia

O importe desta prestación será igual á cota parte que ao partícipe, na data da súa liquidación, lle corresponda do fondo de capitalización que se constituirá para esta prestación coas achegas definidas indicadas no artigo 20 das presentes especificacións, máis os rendementos, netos de gastos, que estas xeren no fondo.

Artigo 31.- Prestación por falecemento

O importe desta prestación causada por un partícipe será igual á cota parte que ao partícipe, na data da súa liquidación, lle corresponda do fondo de capitalización que se constituirá para esta prestación coas achegas definidas indicadas no artigo 20 das presentes especificacións, máis os rendementos, netos de gastos, que estas xeren no fondo.

No caso de falecemento de beneficiarios con modalidade de renda financeira temporal, o importe do fondo de capitalización pendente de liquidar.

Artigo 32.- Prestacións dos partícipes en suspenso

Os partícipes en suspenso terán dereito ás seguintes prestacións:

a) Prestación de xubilación ou equivalente: a partir do día en que teña dereito de acordo co artigo 25.a), o propio partícipe en suspenso cobrará un capital, ou renda equivalente, cuxo importe será igual á capitalización financeira dos seus dereitos consolidados á data do cesamento, á taxa real de rendibilidade que obteña o plan no fondo desde esa data ata a data de liquidación da prestación.

b) Prestación de falecemento: en caso de falecemento do partícipe en suspenso antes de alcanzar a súa data de xubilación, os seus beneficiarios cobrarán un capital ou renda equivalente cuxo importe será igual á capitalización financeira dos seus dereitos consolidados á data do cesamento, á taxa real de rendibilidade que obteña o plan no fondo desde esa data ata a data de liquidación da prestación.

c) Prestación de invalidez: a partir do momento en que o partícipe cause baixa por invalidez, este cobrará un capital ou renda equivalente cuxo importe será igual á capitalización financeira dos seus dereitos consolidados á data do cesamento, á taxa real de rendibilidade que obteña o plan no fondo desde esa data ata a data de liquidación da prestación.

d) Prestación de dependencia: a partir do momento en que o partícipe cause baixa por dependencia, este cobrará un capital ou renda equivalente cuxo importe será igual á capitalización financeira dos seus dereitos consolidados á data do cesamento, á taxa real de rendibilidade que obteña o plan no fondo desde esa data ata a data de liquidación da prestación.

Artigo 33.- Modalidades de pagamento das prestacións

1. As prestacións ás que os beneficiarios teñen dereito, como consecuencia das continxencias indicadas no artigo 25 anterior, poderán ter as seguintes modalidades:

a) Capital.

Percepción de pagamento único, podendo ser inmediato á data de continxencia ou diferido a un momento posterior. O seu importe será igual ao valor dos dereitos consolidados do causante no momento da remuneración da prestación.

En razón dunha mesma continxencia, un beneficiario só poderá obter unha única prestación desta modalidade

Se chegado o vencemento, o beneficiario se opón ao cobramento do capital, ou non sinalase o medio de pagamento, a entidade xestora depositará o seu importe nunha entidade de crédito a disposición ou por conta do beneficiario, entendéndose así satisfeita a prestación a cargo do plan.

b) Renda.

O seu importe dependerá do valor dos dereitos consolidados, do causante no momento de acreditar o dereito á prestación, do tipo de renda a cobrar e das tarifas que a Comisión de Control do Plan pactase coa entidade aseguradora do pagamento das citadas rendas

c) Mixta.

É unha combinación das dúas modalidades anteriores.

2. O beneficiario do Plan de pensións ou o seu representante legal deberá solicitar a prestación sinalando, se é o caso, a forma escollida para o seu cobramento e presentar a documentación acreditativa da continxencia.

A comunicación e acreditación documental poderá presentarse ante as entidades xestora, depositaria ou promotora do plan de pensións, vindo obrigado o receptor a realizar as actuacións necesarias encamiñadas ao recoñecemento e efectividade da prestación.

3. Para os beneficiarios que decidan cobrar a súa prestación baixo a modalidade de renda, o plan prevé os seguintes tipos:

a) Rendas financeiras temporais, sen ningún tipo de garantía.

b) Rendas actuariais temporais coa garantía de xuro mínimo.

c) Rendas actuariais vitalicias con garantía de xuro mínimo. Estas rendas poderán ser puras ou reversíbeis nunha determinada porcentaxe.

4. Respecto das rendas do apartado 3 anterior:

▫Nas rendas do tipo a), o propio beneficiario asume o risco da obtención da rendibilidade esperada e o plan non precisa reservas patrimoniais nin marxe de solvencia.

As rendas dos tipos b) e c) necesariamente estarán aseguradas polo que o plan tampouco precisará constituír por elas reservas patrimoniais nin marxe de solvencia. A elección dunha renda deste tipo comporta a renuncia do partícipe ou beneficiario a revogar ou alterar a designación de beneficiarios.

5. Os dereitos económicos dos beneficiarios non poderán mobilizarse agás por terminación do Plan de pensións.

6. As prestacións do Plan de pensións terán o carácter de dinerarias.

Artigo 34.- Procedemento e recoñecemento do pagamento de prestacións

1. Producida a continxencia determinante dunha prestación, o titular beneficiario porao en coñecemento da entidade xestora do fondo, debendo acompañar a información necesaria e a documentación acreditativa do seu dereito á prestación.

2. A documentación referida será examinada pola entidade xestora, a cal poderá solicitar cantos datos complementarios estime necesarios.

3. A entidade xestora notificaralle ao beneficiario o recoñecemento do seu dereito á prestación, ou a súa denegación, de ser o caso, no prazo máximo legal desde a recepción de toda a documentación. A denegación deberá ser motivada. Igual notificación cursará de forma simultánea á Comisión de Control do Plan, a quen corresponde a supervisión do cumprimento das normas deste plan. No dito recoñecemento, indícarase a forma, modalidade e contía da prestación, periodicidade e vencementos, formas de revalorización, posíbeis reversións e grao de aseguramento ou garantía.

4. Se o beneficiario optase por cobrar a prestación en forma de capital inmediato, a entidade xestora procederá ao seu aboamento no prazo de sete días desde que aquel presentase a documentación correspondente ou no prazo que determine a normativa vixente en cada momento.

O primeiro pagamento dunha prestación en forma de renda, será efectuado dentro do prazo máximo legal establecido desde a recepción pola entidade xestora de toda a documentación necesaria para acreditar o dereito ao seu cobramento.

5. Para calquera reclamación que os beneficiarios poidan formular, dirixiranse á Comisión de Control do Plan, a través do seu secretario, quen a incluírá na orde do día da reunión que se celebre. Esta reunión deberá celebrarse nun prazo máximo de vinte días desde a recepción da reclamación e o acordo correspondente adoptarase no prazo máximo dun mes desde a recepción da reclamación. Do acordo adoptado en relación coa reclamación presentada darase traslado ao beneficiario, así como á entidade xestora do fondo, nun prazo de dez días.

6. Unha vez comunicada polo promotor á entidade xestora o acaecemento dunha continxencia que poida dar lugar ao cobramento dunha prestación, e non comunicado este feito por ningún titular beneficiario, a entidade xestora dará conta á Comisión de Control do Plan desta circunstancia para o seu coñecemento.

Artigo 34.- Certificados de percepción de prestacións

1. Ao peche de cada ano natural, a entidade xestora do fondo remitiralles aos beneficiarios un certificado no que indicará o importe da prestación percibida durante o ano, así como as retencións practicadas a conta do imposto sobre a renda das persoas físicas.

2. Así mesmo, se o beneficiario opta polo cobramento dunha prestación en forma de renda, a entidade xestora do fondo entregarlle un certificado acreditativo da súa condición no que se especificarán as características (duración, forma de cobramento, revalorización, ...) e contía da renda. Se a renda está asegurada indícarase tamén a denominación da entidade aseguradora e o número de contrato de seguro que lle garante ao plan a cobertura da prestación.

CAPITULO V ORGANIZACIÓN E CONTROL

Artigo 36.- A Comisión de Control do Plan

1. O funcionamento e execución do Plan de pensións serán supervisados por unha Comisión de Control, formada por representantes do promotor, partícipes e, se é o caso dos beneficiarios, de forma que se garanta a presenza de todos os intereses, respectándose en todo momento unha representación paritaria do promotor e dos partícipes.

Os representantes dos partícipes desempeñarán a representación dos beneficiarios do Plan de pensións. Cando no desenvolvemento do plan este quedase sen partícipes a súa representación corresponderalle aos beneficiarios.

2. A Comisión de Control e, se é o caso, a Comisión Promotora, estará composta por 10 membros, de acordo co seguinte reparto:

- Polo promotor: 5 membros.
- Polos partícipes: 5 membros.

3. O cargo de membro da Comisión de Control será gratuíto

Artigo 37.- Funcións da Comisión de Control

A Comisión de Control do Plan terá as seguintes funcións:

a) Supervisar o cumprimento das cláusulas do plan en todo o que se refire aos dereitos dos partícipes e beneficiarios.

b) Seleccionar o actuario ou actuarios que deban certificar a situación e dinámica do plan e seleccionar a entidade aseguradora para o aseguramento das prestacións que se perciban en forma de renda, ás que se refire o artigo 19.3 destas especificacións. Designar o actuario independente e, se é o caso, aqueles profesionais independentes que sexan precisos para a revisión financeiro-actuarial do plan conforme á normativa en vigor

c) Nomear os representantes da Comisión de Control do Plan na Comisión de Control do Fondo de Pensións ao que estea adscrito.

d) Propor as modificacións que estime pertinentes sobre achegas, prestacións e outras variábeis, derivadas das revisións actuariais requiridas pola presente normativa. Deberá seguirse o procedemento establecido nas especificacións do propio plan.

e) Supervisar a adecuación do saldo da conta de posición do plan, no seu respectivo fondo de pensións, aos requirimentos do réxime financeiro do propio plan.

f) Representar xudicial e extraxudicialmente os intereses dos partícipes e beneficiarios do plan diante da entidade xestora do fondo de pensións.

g) Propor e, se é o caso, decidir nas demais cuestións sobre as que a lexislación vixente lle atribúa competencias.

Artigo 38.- Elección dos membros da Comisión de Control e da Comisión Promotora

1. Os representantes do promotor na Comisión de Control e na Comisión Promotora do Plan serán designados directamente por este, podendo ser renovados en calquera momento, realizándose a oportuna comunicación á Comisión de Control ou á Comisión Promotora respectivamente.

2. Os representantes dos partícipes na Comisión de Control e na Comisión Promotora do Plan serán electos polos órganos de representación do persoal da Deputación provincial (Xunta de Persoal e Comité de Empresa), garantíndose a presenza dos cinco sindicatos máis votados nas eleccións aos citados órganos.

Estes representantes poderán ser renovados en calquera momento, así como a consecuencia de procesos electorais dos citados representantes dos traballadores realizándose a oportuna comunicación á Comisión de Control ou á Comisión Promotora respectivamente. En todo caso as ditas designacións terán unha duración máxima de catro anos.

Os partícipes en suspenso non serán susceptíbeis de seren electos como membros da Comisión de Control.

Artigo 39.- Duración do cargo de membro da Comisión de Control

A duración do cargo electo de membro da Comisión de Control será dun máximo de catro anos, podendo ser reelixido.

Artigo 40.- Funcionamento da Comisión de Control

1. A Comisión de Control designará un presidente a quen lle corresponderá convocar as súas sesións, dirixir as deliberacións e asumir a súa representación. O voto do presidente será de calidade en caso de empates.

2. Así mesmo, designará un/ha secretario/a que redactará a acta das sesións e levará os libros de actas.

3. A Comisión de Control quedará validamente constituída cando, debidamente convocada, estean presentes, polo menos, a metade máis un dos seus membros. A representación dun membro na Comisión de Control só poderá ser delegada noutro membro desta.

4. Os acordos da Comisión de Control adoptaranse, polo menos, por maioría absoluta (a metade máis un) dos membros da Comisión de Control presentes ou representados. Non obstante, os acordos e decisións que afecten á política de investimento do fondo de pensións, nos termos recollidos no artigo 32.2 do vixente Regulamento de plans e fondos de pensións, incluírán, polo menos, o voto favorable da metade dos representantes dos partícipes na Comisión de Control.

5. A Comisión de Control reunirse: a) polo menos, unha vez cada trimestre, b) cando así o soliciten, como mínimo, o 25% dos seus membros e, c) cando o prevexan estas especificacións.

6. As convocatorias das reunións da Comisión de Control realizaraas o secretario coa conformidade do presidente e notificadas aos demais membros da Comisión, con, polo menos, unha semana de antelación á data prevista para a reunión por medio de carta ou calquera outro medio de comunicación con xustificante de recepción, salvo que a reunión teña carácter moi urxente, suposto en que se efectuará con vinte e catro horas de antelación. A citada convocatoria deberá conter a orde do día prevista para a reunión.

Non obstante o anterior, a Comisión entenderase convocada e quedará validamente constituída para tratar calquera asunto, sempre que estean presentes todos os seus membros e eles acepten por unanimidade a celebración da reunión.

7. En caso de ausencia do presidente, actuará como o seu suplente, o membro presente da Comisión de maior idade. No caso de ausencia do secretario, actuará como o seu suplente, o membro presente da Comisión de menor idade. As anteditas suplencias quedarán reflectidas na acta da reunión correspondente.

8. A orde do día será proposta polo secretario e presidente ou, se é o caso, polos membros ou entidades que soliciten legalmente a convocatoria. Non obstante, a orde do día de cada reunión poderá ser alterada, o día previsto para a reunión, se consta que todos os membros están de acordo.

9. A Comisión Promotora terá o mesmo funcionamento e réxime de acordos que o establecido para a Comisión de Control.

CAPITULO VI MODIFICACIÓN E LIQUIDACIÓN

Artigo 41.- Modificación do Plan de pensións

1. A modificación do presente Regulamento do Plan de pensións poderá realizarse a instancias de, polo menos, o 25% dos membros da súa Comisión de Control.

2. A proposta de modificación requirirá:

a) Ditame previo favorable dun actuario, sempre que a dita modificación afecte ao sistema financeiro do plan.

b) Que o acordo sexa tomado por maioría dos dous terzos (2/3) dos membros da Comisión de Control.

3. En todo caso, calquera cambio ou modificación que afecte ás bases económicas do plan ou á contía da contribución e outras obrigas do promotor non terá efecto ata que o dito acordo sexa ratificado polo promotor.

4. Nos demais supostos en que a normativa vixente o esixa.

Artigo 42.- Terminación do Plan de pensións

1. Serán causas para a terminación, e posterior liquidación, do presente plan de pensións:

a) O acordo de liquidación do plan tomado por polo menos o 75% dos membros da Comisión de Control.

b) Calquera causa legalmente establecida.

2. En todo caso, serán requisitos previos para a terminación do plan a garantía individualizada das prestacións causadas e a integración dos dereitos consolidados dos partícipes noutro Plan de pensións.

Artigo 43.- Normas para a liquidación do Plan de pensións

Decidida a terminación do plan de pensións, a súa liquidación definitiva realizarase de acordo coas seguintes normas:

a) A Comisión de Control do Plan, por medio da entidade xestora, comunicará a terminación do plan a todos os partícipes e beneficiarios cunha antelación de tres meses.

b) Durante o dito período de tres meses os partícipes deberánlle comunicar á Comisión de Control do Plan, a través da entidade xestora, a que plans desexan trasladar os seus dereitos consolidados.

c) Durante o mesmo período, os beneficiarios deberán comunicarlle á Comisión de Control do Plan, a través da entidade xestora, a que plans desexan trasladar os seus dereitos derivados das prestacións causadas.

d) Se chegada a data de terminación do plan, algún partícipe ou beneficiario non lle comunicase á Comisión de Control o indicado nos anteriores apartados b) e c), a entidade xestora procederá ao traslado dos seus dereitos consolidados ou derivados a outro Plan de pensións que fose seleccionado pola Comisión de Control.

e) Unha vez trasladados os dereitos consolidados de todos os partícipes e os dereitos derivados dos beneficiarios, a Comisión de Control do Plan comunicarlle á entidade xestora do fondo ao que estaba adscrito a terminación definitiva do plan.

f) Finalmente, a Comisión de Control do Plan procederá á súa disolución.

CAPÍTULO VII INSTANCIAS DE RECLAMACIÓN

Artigo 44.- Instancias de reclamación

Correspóndelle á Comisión de Control a tutela e protección dos dereitos dos partícipes e beneficiarios dos plans de pensións, debendo coidar que tales dereitos sexan respectados pola promotora do plan, así como a xestora e a depositaria do fondo de pensións e actuar de conformidade aos principios de boa fe, equidade e confianza recíproca.

Os partícipes e beneficiarios do plans de pensións poden dirixir as súas reclamacións á Comisión de Control, cando estimen que na actuación das entidades promotora, aseguradora, xestora ou depositaria sufrisen un tratamento negligente, incorrecto ou non axustado a dereito.

As reclamacións presentaranse por escrito, debidamente asinadas polo reclamante ou o seu representante legal. Nas reclamacións necesariamente farase constar o nome, apelidos, número do DNI ou, no seu defecto, os datos do documento que acredite fidedignamente a personalidade do reclamante, así como o seu domicilio e o nome do Plan de pensións do que é partícipe ou beneficiario.

Así mesmo, a entidade xestora e a entidade depositaria poñen a disposición dos seus clientes o seu Servizo de Atención ao Cliente na R/ Picavía, 8 1º Esqda. da Coruña, Fax 981.21.78.99 e San Andrés 135-137, 1º 15003 A Coruña, Fax: 981 202 494 , e-mail: atencioncliente@caixagalicia.es, respectivamente.

O citados servizos atenderán e resolverán conforme á normativa vixente, no prazo máximo de dous meses desde a súa presentación, as queixas e reclamacións formuladas directamente ou mediante representación acreditada por todos os partícipes ou beneficiarios do Plan de pensións, cando estas se refiran a intereses e dereitos legalmente recoñecidos relacionados co desenvolvemento do plan, xa deriven destas especificacións, da normativa reguladora dos plans e

fondos de pensións, da normativa de transparencia e protección da clientela ou das boas prácticas e usos, en particular do principio de equidade.

As queixas e reclamacións presentaranse por escrito en calquera das oficinas da entidade, por correo ou por medios informáticos, electrónicos ou telemáticos sempre que estes permitan a súa lectura, impresión e conservación, e respondan aos requisitos e características legais, establecidas no Regulamento do Servizo de Atención ao Cliente de BIAGALICIA ou da Caixa de Aforros de Galicia, segundo se trate.

Unha vez obtida a resolución e esgotada a vía de reclamación perante o Servizo de Atención ao Cliente, en caso de manter a súa desconformidade co resultado do pronunciamento ou transcorridos dous meses desde a data de recepción sen que o dito servizo resolverse, poderá o reclamante presentar a súa reclamación perante o Comisionado para a Defensa do Asegurado e do Partícipe en Plans de Pensións en Paseo de la Castellana, 44, 28046 Madrid, fax 91 339 7113, cuxas decisións, non obstante, non son vinculantes. Igualmente, poderá sometelas aos xulgados e tribunais competentes.

En todas as oficinas de BIAGALICIA e da Caixa de Aforros de Galicia abertas ao público e na páxina web desta última, os seus clientes, usuarios ou prexudicados, encontrarán á súa disposición o Regulamento para a defensa do cliente correspondente, que regula a actividade e o funcionamento do Servizo de Atención ao Cliente e as características e requisitos de presentación e resolución de queixas e reclamacións.

Nas resolucións teranse en conta as obrigas e dereitos establecidos na normativa reguladora dos plans e fondos de pensións e a normativa de transparencia e protección dos clientes de servizos financeiros (Real decreto legislativo 1/2002, do 29 de novembro, polo que se aproba o Texto refundido da lei de regulación dos plans e fondos de pensións, Real decreto 304/2004, do 20 de febreiro, polo que se aproba o Regulamento de plans e fondos de pensións, Lei de reforma do sistema financeiro, Lei de institucións de investimento colectivo, RD 303/2004 do 20-2 e Orde ECO 734/2004 do 11-3, Lei e regulamento para a defensa de consumidores e usuarios, Lei de condicións xerais da contratación).

Disposición Adicional Única.-

Durante a duración do contrato de xestión do Plan de pensións para o persoal da Deputación provincial adxudicado a BIA GALICIA DE Seguros y Reaseguros, S.A., como entidade xestora, e a CAIXA GALICIA, como entidade depositaria, aprobado por acordo plenario do 30/12/2002 desta Deputación Provincial da Coruña, e de acordo co establecido no artigo 15.c) destas especificacións, en caso de cesamento definitivo da relación funcional ou laboral, o Plan de pensións destinatario da mobilización, no caso de que o partícipe non lle comunicase á xestora do plan ao que o quere mobilizar, será CAIXA GALICIA PLUS 30, Plan de pensións.

Disposición Transitoria Única.-

O pagamento das achegas do promotor, mencionadas no artigo 21.3 destas especificacións, e referentes á achega inicial correspondente ao exercicio 2002 [artigo 21.3.a)] e á achega regular anual [artigo 21.3.b)] correspondente ao exercicio 2003, realizarase dentro do primeiro semestre do exercicio 2003, e en relación cos partícipes pertencentes ao colectivo A do plan (persoal funcionario de carreira e persoal laboral fixo do cadro de persoal) que estean en activo a 31 de decembro do ano 2002 e manifestasen a súa vontade de adhesión ao Plan de pensións desde a súa constitución.”

19.- PROPOSTA DE INCREMENTO DA PARTICIPACIÓN DA DEPUTACIÓN PROVINCIAL DA CORUÑA NO PROXECTO EUROPEO INTERREG III-A, DENOMINADO TURMAS.

Por unanimidade, apróbase o seguinte ditame da comisión:

“1º. Incrementar a participación da Deputación da Coruña no proxecto europeo Interreg III-A denominado “TURMAS”, asumindo o orzamento rexeitado polo Concello de Corcubión, coa finalidade de reforzar as accións xerais de sensibilización e difusión:

Incremento orzamentario Deputación da Coruña	Achega FEDER (75%)	Cofinanciamento provincial (25%)	Aplicación orzamentaria
66.666,67 €	50.000€	16.666,67€	0104 560D 22799

A achega provincial financiarase con cargo á aplicación orzamentaria 0104/560A/227.06.

2º. Facultar ao presidente da deputación para a execución do presente acordo. “

20.- CONVENIO PARA INSTRUMENTALIZAR UNHA SUBVENCIÓN NOMINATIVA A FAVOR DA “ASOCIACIÓN FINISTERRE EN AMÉRICA” (ARXENTINA) CO OBXECTO DE COLABORAR NO FINANCIAMENTO DE REFORMAS NO LOCAL SOCIAL E EQUIPAMENTO DUNHA AULA DE INFORMÁTICA.

Por unanimidade, apróbase o seguinte ditame da comisión:

“1º. Aprobar a formalización dun convenio de colaboración, cuxo texto se xunta, coa entidade “ASOCIACIÓN FINISTERRE EN AMÉRICA” (Arxentina), co obxecto de colaborar no financiamento de reformas no local social e equipamento dunha aula de informática, cunha achega provincial de 17.552 € (80% do orzamento subvencionado de gastos), que se imputará á partida 0104/463C/78901 do Orzamento xeral de 2007.

2º. Facultar ao presidente da deputación para a execución do presente acordo. “

Número /2007

CONVENIO DE COLABORACIÓN ENTRE A DEPUTACIÓN PROVINCIAL DA CORUÑA E A ASOCIACIÓN FINISTERRE EN AMÉRICA (ARXENTINA) PARA A REALIZACIÓN DE REFORMAS NO LOCAL SOCIAL E EQUIPAMENTO DUNHA AULA INFORMÁTICA

..... de de 2007

REUNIDOS

Dunha parte D. Salvador Fernández Moreda, que intervéen neste acto en nome e representación da Excm. Deputación Provincial da Coruña, que actúa na súa calidade de presidente e conforme ás competencias que ten atribuídas.

Doutra, D. Albino Rivas Lorenzo, que intervéen neste acto en nome e representación da *Asociación Finisterre en América* (Arxentina), cuxo domicilio social está na rúa 12 de outubro –

629, Avellaneda (Bos Aires – Arxentina), entidade sen ánimo de lucro, constituída no ano 1926 ao abeiro da lexislación da República Arxentina, que actúa na súa calidade de presidente e conforme ás competencias que ten atribuídas de acordo co artº 24 dos seus estatutos.

Ambos comparecentes recoñécense mutuamente capacidade, lexitimación e representación suficientes para formalizar o presente convenio de colaboración, e

EXPOÑEN

A Deputación da Coruña é unha entidade pública local de ámbito provincial que ten como fins propias e específicas garantir os principios de solidariedade e equilibrio intermunicipais, entre cuxas competencias está a de cooperación no fomento do desenvolvemento económico e social e, en xeral, o fomento e administración dos intereses peculiares da provincia.

A *Asociación Finisterre en América* (Arxentina) é unha institución privada sen fin de lucro, de carácter cultural, recreativo e deportivo, que tamén realiza actuacións asistenciais entre os seus asociados e a emigración galega en xeral.

As asociacións de comunidades galegas no exterior son, en moitos casos, o único vínculo de unión que os galegos e galegas do exterior manteñen coa súa terra de orixe. A provincia da Coruña, os seus cidadáns e as institucións que a representan teñen, e deben manter, unha estreita relación solidaria con aqueles dos seus concidadáns que por diversas circunstancias están lonxe da súa terra.

A problemática situación económica e social pola que están atravesando a maioría dos países latinoamericanos, trae consigo que moitos dos cidadáns galegos que neles residen estean vivindo unha insostible situación persoal de precariedade económica e asistencial.

Sendo finalidade común a ambas as dúas entidades procurar unha mellor calidade de vida para aqueles que están máis necesitados, prestando especial atención aos colectivos da terceira idade e da xuventude, xa que son estes colectivos os que máis sofren as consecuencias da crise económica e, en moitos casos, impídelles dispor dos medios para garantirles unha cobertura asistencial axeitada.

É por iso que ambas as dúas entidades, ao considerar conveniente a realización de actuacións que impliquen garantir unha calidade de vida mínima para a comunidade galega no exterior, acordan a realización dun convenio de colaboración suxeito ás seguintes

CLÁUSULAS

PRIMEIRA: OBXECTO DO CONVENIO

Colaborar no financiamento de reformas no local social, sito na rúa 12 de outubro – 629, cidade de Avellaneda (1870), provincia de Bos Aires – Arxentina, así como do equipamento dunha aula de informática.

SEGUNDA: CONTIDO DA COLABORACIÓN

A Deputación da Coruña comprométese a achegar a cantidade de 17.552 euros para o financiamento do obxecto do convenio, citado na cláusula anterior, cuxo orzamento de gastos é de 21.940 euros, segundo o seguinte detalle:

1. Creación dun novo escenario:	
a. Demolición actual	875
b. Albanelería e pintura	900
c. Carpintería	370
d. Electricidade	<u>300</u>
	2.445
2. Recuperación de cuberta e pintado:	
a. Pranchas de uralita	900
b. Man de obra	520
c. Pintura e man de obra	<u>960</u>
	2.380
3. Construción de baños:	
a. Demolición dos actuais	480
b. Albanelería	1.820
c. Pezas de baño	450
d. Electricidade	<u>525</u>
	3.275
4. Creación dunha aula de informática:	
a. Demolicións	450
b. Albanelería	950
c. Carpintería	890
d. Electricidade	725
e. Mobiliario	2.325
f. Equipos informáticos	<u>8.500</u>
	13.840
TOTAL	21.940 €

Segundo o anterior, o coeficiente de financiamento é do 80 %. O resto asúmeo a entidade beneficiaria.

A entidade beneficiaria comprométese a dar cumprimento ao artº 31.3 da Lei 38/2003, do 17 de novembro, xeral de subvencións, segundo o cal, cando o importe do gasto subvencionable supere a contía de 30.000 euros, no suposto do custo por execución de obra, ou de 12.000 euros, no suposto de subministración de bens de equipo ou prestación de servizos por empresas de consultoría ou asistencia técnica, o beneficiario deberá solicitar como mínimo tres ofertas de diferentes provedores, con carácter previo á contracción do compromiso para a prestación do servizo ou a entrega do ben, salvo que por as especiais características dos gastos subvencionables non exista no mercado suficiente número de entidades que o subministren ou presten, ou salvo que o gasto se realizase con anterioridade á solicitude da subvención.

A achega da deputación poderá materializarse en dous prazos, como máximo:

- 1º prazo: Por importe de 8.776 € (50 % da achega) despois da sinatura do convenio. Previo ao aboamento, a entidade deberá presentar aval suficiente, nos termos das Bases de execución do orzamento da deputación para o ano 2007.
- 2º prazo: Por importe de 8.776 € (50 % restante) despois da xustificación do cumprimento do convenio, mediante a presentación da seguinte documentación:
 - o Memoria da actuación, subscrita polo presidente ou representante da entidade beneficiaria, xustificativa do cumprimento, aludindo á publicidade do financiamento provincial
 - o Facturas ou documentos de valor probatorio equivalente, acreditativos das adquisicións e servizos

- Acreditación do acordo de recepción das obras e subministracións, así como da aprobación das facturas polo órgano competente da entidade beneficiaria

:

Os correspondentes pagamentos materializaranse despois dos informes do Servizo de Planificación, Desenvolvemento Territorial e Unión Europea e do Servizo de Fiscalización. Da súa aprobación darase conta ao Servizo de Patrimonio e Contratación.

A entidade beneficiaria deberá acreditar que está ao corrente no cumprimento das súas obrigas tributarias e coa Seguridade Social, se é o caso.

Para os efectos de cuantificar o gasto subvencionable xustificado en moeda distinta ao euro, aplicarase o tipo de cambio oficial establecido no día de remisión da documentación xustificativa á deputación. Todos os pagamentos que realice a deputación serán en moeda euro.

A *Asociación Finisterre en América* comprométese a:

- a. Dar publicidade do financiamento das obras e adquisicións con cargo aos orzamentos da Deputación da Coruña.
- b. Poñer en coñecemento da deputación aquelas axudas que lle sexan concedidas para a mesma finalidade. A achega provincial reducirase na medida que a axuda percibida minore o custo das obras e adquisicións financiadas.
- c. Destinar as instalacións obxecto de reforma e equipamento subvencionados á finalidade indicada no presente convenio durante un prazo mínimo de cinco anos. O incumprimento da obriga de destino será causa de reintegro da subvención percibida, nos termos establecidos na lexislación española.

No caso de que non se xustifique a totalidade dos gastos financiados, minorarase a achega da deputación, aboándose o 80% da cantidade realmente xustificada.

A falta de xustificación en prazo, sen que medie solicitude de prórroga, dará lugar ao reintegro do importe percibido e non xustificado, conforme ao previsto na cláusula sexta.

TERCEIRA: DIRECCIÓN TÉCNICA DO CONVENIO

A dirección técnica do presente convenio corresponderalle ao Servizo de Planificación, Desenvolvemento Territorial e Unión Europea.

CUARTA: VIXENCIA DO CONVENIO

O presente convenio estará en vigor durante o ano 2007, dende a súa sinatura. En ningún caso producirá efectos despois do 31 de decembro de 2007, salvo que a beneficiaria solicite motivadamente unha prórroga para a súa xustificación.

QUINTA: INTERPRETACIÓN E RÉXIME XURÍDICO

As lagoas ou diverxencias que se poidan apreciar na aplicación do presente convenio integraraas, interpretaraas e resolveraas motivadamente a Deputación da Coruña, de acordo co disposto no presente convenio e na normativa española aplicable, principalmente na Lei 38/2003, do 17 de novembro, xeral de subvencións, no regulamento que a desenvolve, aprobado por Real decreto 887/2006, do 21 de xullo, e nas Bases de execución do orzamento da Deputación Provincial da Coruña para 2007.

Malia o indicado no parágrafo anterior, calquera das partes poderá iniciar as accións xurisdicionais que considere oportunas, declarándose, neste mesmo convenio, sometidas ambas as partes ao foro xurisdiccional dos órganos da administración de Xustiza que foran competentes no ámbito da Coruña.

SEXTA: INCUMPRIMIENTO

O incumprimento de calquera das estipulacións do presente convenio constituirá causa suficiente para a súa resolución.

A *Asociación Finisterre en América* deberá de reintegrarlle ao erario provincial aquelas cantidades que, percibidas con carácter previo á realización das obras ou adquisicións, non foran adecuadamente xustificadas. A aplicación dos xuros de mora correspondentes non procederá cando o incumprimento obedecese a causa non imputable á entidade beneficiaria.

Faise constar que o presente convenio foi aprobado por resolución da Presidencia nº

E en proba de conformidade, asinan por exemplar cuadruplicado o presente documento no lugar e data arriba indicados

O PRESIDENTE DA DEPUTACIÓN O
PROVINCIAL DA CORUÑA

Asdo: “

Asdo. Salvador Fernández Moreda

Sen máis asuntos dos que tratar remata a sesión, sendo as doce horas e vinte minutos, procedéndose a redacta-la acta e autorizándose a súa transcripción, que asino co Ilmo. Sr. Presidente, de todo o cal, eu, o Secretario, dou fe.